

MESYUARAT KETIGA, PENGGAJAL KELIMA  
PARLIMEN KEEMPAT BELAS  
2022

**HARI ISNIN : 3 OKTOBER 2022**

**JAWAPAN-JAWAPAN BAGI PERTANYAAN-PERTANYAAN  
JAWAB LISAN YANG TIDAK DIJAWAB DI DALAM DEWAN  
( SOALAN NO. 9 HINGGA NO. 40 )**

**NOTA : [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK MOHAMADDIN BIN KETAPI  
[ LAHAD DATU ]**

**TARIKH : 3 OKTOBER 2022 ( ISNIN )**

**SOALAN**

**DATUK MOHAMADDIN BIN KETAPI [ LAHAD DATU ]** minta **PERDANA MENTERI** menyatakan selain daripada mengembalikan 35 peratus kerusi Parlimen (Dewan Rakyat) di Sabah dan Sarawak, adakah Kerajaan bercadang untuk meningkatkan jumlah wakil Senator (Dewan Negara) dari Sabah dan Sarawak agar ianya lebih menyeluruh dan mencerminkan semangat Perjanjian Malaysia 1963.

**JAWAPAN**

Tuan yang-Dipertua,

Untuk makluman Ahli Yang Berhormat, cadangan berhubung dengan pertambahan jumlah ahli Dewan Negara (Senator) dari Sabah dan Sarawak, belum ada perbincangan secara rasmi mahupun permohonan daripada Kerajaan Negeri Sabah dan Sarawak dikemukakan kepada Majlis Khas M63. Sekiranya ada, perkara ini akan diteliti dengan sebaiknya.

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN FONG KUI LUN  
( BUKIT BINTANG )**

**TARIKH : 03 OKTOBER 2022 (ISNIN)**

**SOALAN**

**TUAN FONG KUI LUN ( BUKIT BINTANG )** minta **MENTERI WILAYAH PERSEKUTUAN** menyatakan persiapan Kementerian bagi menghadapi bencana banjir yang dijangka melanda Kuala Lumpur pada akhir tahun 2022 dan apakah pengajaran yang diambil dari kes banjir 2021.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Dewan Bandaraya Kuala Lumpur (DBKL) telah menubuhkan satu **Jawatankuasa Tindakan Khas Banjir** yang dibantu pelaksanaannya oleh Pasukan Tindakan Khas Banjir yang melibatkan jabatan dalaman DBKL dan Agensi Sahabat seperti **Angkatan Pertahanan Awam Malaysia (APM), PDRM, Bomba, Jabatan Kebajikan Wilayah Persekutuan, Jabatan Kesihatan Wilayah Persekutuan dan Jabatan Metereologi** sebagai satu kaedah yang lebih sistematik dalam usaha menangani serta memberi bantuan semasa berlakunya banjir jalan atau banjir kilat di Wilayah Persekutuan Kuala Lumpur. **Seramai 240 petugas DBKL dan 242 petugas APM** ditugaskan secara syif untuk memantau dan melaksanakan tindakan di hotspot-hotspot banjir di sekitar Kuala Lumpur . Selain daripada itu, 1,000 sukarelawan telah disiapsiagakan untuk menghadapi sebarang kemungkinan berlakunya banjir di Kuala Lumpur.

## SOALAN NO : 10

Jabatan Meteorologi Malaysia menjangka keadaan hujan serta Monsun Timur Laut akan bermula pada November 2022 dan berakhir pada bulan Mac 2023. Beberapa siri hujan lebat juga dijangka akan berlaku di beberapa tempat di Semenanjung Malaysia. **Sehubungan dengan itu, penempatan petugas di lokasi *hotspot* banjir telah dikekalkan sehingga ke satu tempoh yang akan diberitahu kelak.**

Untuk makluman Ahli Yang Berhormat juga, **DBKL telah mengenalpasti beberapa lokasi yang boleh dijadikan penempatan Pusat Pemindahan Sementara (PPS) banjir yang melibatkan 16 Pusat Komuniti dan Kompleks Sukan, 15 Dewan Serbaguna DBKL serta 21 buah sekolah rendah dan menengah di sekitar Kuala Lumpur yang berkemampuan menampung sehingga 11, 750 orang mangsa apabila berlaku bencana.**

Pihak DBKL juga telah memasang sistem amaran banjir DBKL di beberapa lokasi sebagai projek rintis (*pilot project*). Antara lokasinya adalah:

1. Jalan Penchala Hilir 6
2. Jalan 9, Kg Cheras Baru
3. Jalan Taman U Tant
4. Jalan Chan Sow Lin
5. Dataran Merdeka (berhampiran Jam Detik)

Konsep dan kaedah operasi sistem ini adalah seakan sama dengan sistem amaran banjir dari pihak Jabatan Pengairan dan Saliran Kuala Lumpur yang mana siren amaran akan dibunyikan sekiranya paras air sungai telah mencapai tahap bahaya.

**Berdasarkan pengajaran yang diambil, KWP dan DBKL telah mengambil langkah-langkah berikut:**

1. Tahap siap siaga telah dipertingkatkan memandangkan kejadian banjir pada masa kini tidak dapat diramal dengan tepat seperti sebelum ini ekoran perubahan cuaca (*climate change*) dunia. Dalam hal ini, antara prosedur yang akan dilaksanakan ialah pemindahan penduduk ke Pusat Pemindahan Sementara banjir, 2 hari sebelum

## SOALAN NO : 10

banjir diramalkan berlaku supaya tiada keperluan menggunakan bot-bot penyelamat untuk memindahkan mangsa banjir. Selepas banjir diisytiharkan tamat, mangsa banjir boleh terus berada di Pusat Pemindahan Sementara selama 2 hari lagi bagi membolehkan kediaman mereka diperiksa dan dipastikan selamat untuk didiami. Selepas itu, mereka boleh pulang ke kediaman masing-masing. Prosedur ini pernah dilaksanakan oleh Agensi Pengurusan Bencana Negara (NADMA) di negeri-negeri yang sering berlaku banjir seperti Kelantan, Terengganu, Pahang, Johor, Sabah dan Sarawak.

2. Kerja penyelenggaraan parit induk dan sungai telah dilakukan lebih kerap bagi memastikan tahap kapasiti sistem saliran berada pada tahap paling optimum setiap masa.
3. Tahap kesedaran orang awam terhadap kebersihan sungai dan longkang tepi jalan telah dipertingkatkan bagi membudayakan sikap tidak membuang sampah sarap sewenang-wenangnya.
4. Selain daripada itu, standard *Average Recurrence Interval* (ARI) 100 akan ditingkatkan kepada 200 selaras dengan keadaan perubahan cuaca semasa (*climate change*). Ia merupakan standard yang digunakan dalam perancangan sistem saliran sungai di Kuala Lumpur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
[TASEK GELUGOR]**

**TARIKH : 3 OKTOBER 2022 (ISNIN)**

**SOALAN**

Minta **PERDANA MENTERI** menyatakan tindakan yang telah diambil terhadap seorang wanita yang melakukan ibadah umrah dengan berpakaian ihram seperti yang tular baru-baru ini. Apakah tindakan agar perkara ini tidak menjadi ikutan oleh pihak lain sehingga membawa nama buruk kepada Malaysia.

**JAWAPAN**

**SENATOR DATUK HAJI IDRIS HAJI AHMAD  
MENTERI DI JABATAN PERDANA MENTERI  
(HAL EHWAL AGAMA)**

Yang di-Pertua,

1. Untuk makluman Ahli yang Berhormat, Jabatan Kemajuan Islam Malaysia (JAKIM) sebagai agensi penyelaras hal ehwal Islam di peringkat persekutuan sentiasa bekerjasama dengan pihak berkuasa agama negeri-negeri bagi membendung sebarang bentuk penghinaan terhadap agama Islam yang berlaku di dalam negara ini. Beberapa kes yang melibatkan penghinaan agama Islam telah berlaku di media sosial sehingga mendapat liputan meluas kebelakangan ini.

2. Kerajaan memandang serius isu seorang wanita yang melakukan ibadah umrah dengan berpakaian ihram seperti yang tular baru-baru ini. Jabatan Agama Islam Perak melalui kenyataan yang dikeluarkan telah mengambil pendekatan yang lebih harmoni hasil kerjasama baik yang diberikan oleh individu terlibat melalui sesi kaunseling dan bimbingan yang disediakan.

3. Namun begitu, bagi memastikan isu yang sama tidak menjadi ikutan, Jabatan Kemajuan Islam Malaysia (JAKIM) telah melaksanakan pendekatan yang sesuai untuk menangani sebarang bentuk aktiviti penghinaan terhadap agama Islam merangkumi:

- (i) Bekerjasama dengan Majlis Agama Islam Negeri (MAIN) dan Jabatan Agama Islam Negeri (JAIN) dalam aspek pemantauan dan tindakan di bawah peruntukan undang – undang kesalahan jenayah syariah.
- (ii) Jabatan Wakaf, Zakat dan Haji (JAWHAR) selaku agensi agama peringkat persekutuan turut mengambil langkah proaktif dalam menyampaikan informasi kepada masyarakat melalui kaedah advokasi dan penerangan



kepada masyarakat mengenai penipuan pakej umrah. Di samping itu, isu jemaah umrah wanita berpakaian lelaki, pihak JAWHAR akan memberi penekanan dalam taklimat – taklimat kepada Mutawif menerusi Umrah Specialised Enhancement Course (USEC).

- (iii) Memperkukuh kerjasama dengan pihak Polis Di Raja Malaysia (PDRM) dan Suruhanjaya Komunikasi dan Multimedia (SKMM) bagi membanteras kegiatan menghina agama Islam.
- (iv) Meluaskan hebahan melalui media sosial, media cetak dan media elektronik yang bertujuan mendidik masyarakat tentang nilai-nilai murni yang terkandung di dalam agama islam meliputi akidah, ibadah dan akhlak.
- (v) Mempergiatkan program kesedaran kepada mereka yang terlibat berbentuk kerohanian, penyucian jiwa dan psikospiritual.
- (vi) Menjalankan kajian pantas, menganalisis, menyediakan laporan serta berkongsi maklumat dengan rakan-rakan strategik yang lain seperti agensi penguatkuasaan diperingkat persekutuan dan pihak berkuasa agama negeri bagi tujuan penguatkuasaan berdasarkan undang-undang yang berkuatkuasa.

4. Oleh itu, usaha memelihara kesucian dan memartabatkan agama Islam di Malaysia merupakan tanggungjawab semua sesuai dengan kedudukan Islam sebagai agama Persekutuan di negara ini dan pihak kerajaan melalui JAKIM dan agensi agama yang lain akan terus memperkasa agenda untuk meningkatkan kefahaman dan kepatuhan umat Islam terhadap agama melalui pelbagai aspek termasuk penguatkuasaan undang-undang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KE-14**

---

**PERTANYAAN : LISAN**  
**DARIPADA : Y.B. DATO' SERI UTAMA HAJI MUKHRIZ**  
**BIN TUN DR. MAHATHIR [JERLUN]**  
**TARIKH : 03 OKTOBER 2022 (ISNIN)**

**SOALAN**

**DATO' SERI UTAMA HAJI MUKHRIZ BIN TUN DR. MAHATHIR**  
**[ JERLUN ]** minta **PERDANA MENTERI** menyatakan apakah penambahbaikan yang akan Suruhanjaya Pilihan Raya lakukan untuk memastikan peratusan pengundi yang keluar mengundi yang tinggi serta menjamin ketelusan proses mengundi pada Pilihan Raya Ke-15 dan seterusnya. Apakah langkah-langkah yang diambil bagi mengelak dari berlakunya penyelewengan ketika mengundi.

**JAWAPAN**

**YB DATO' SRI DR. HAJI WAN JUNAIDI BIN TUANKU JAAFAR,**

**MENTERI DI JABATAN PERDANA MENTERI**

**(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Suruhanjaya Pilihan Raya (SPR) telah melaksanakan beberapa penambahbaikan bagi memastikan perjalanan pilihan raya di negara ini lebih efisien, adil dan telus. Di antara penambahbaikan yang telah dilaksanakan oleh SPR adalah seperti berikut:

- i. **Mewujudkan saluran khusus kepada pengundi 60 tahun ke atas dan orang kurang upaya (OKU)**

Saluran 1 dan 2 di pusat mengundi adalah dihadkan kepada 450 orang pemilih sahaja dan merupakan saluran khusus kepada pengundi 60 tahun ke atas dan OKU.

- ii. **Pemanjangan tempoh pengundian**

Tempoh masa pengundian dipanjangkan selama 1 jam iaitu bermula jam 8.00 pagi hingga 6.00 petang bagi Semenanjung Malaysia dan 7.30 pagi hingga 5.30 petang bagi Sabah dan Sarawak berbanding pada PRU Ke-14 iaitu bermula jam 8.00 pagi hingga 5.00 petang sahaja. Pemanjangan tempoh masa ini dapat memberi masa yang mencukupi kepada pemilih untuk membuang undi.

- iii. **Penambahan pusat mengundi dan saluran**

Berikutan pelaksanaan undi 18 tahun dan pendaftaran pengundi secara automatik, SPR juga telah mengambil inisiatif untuk menambah jumlah pusat mengundi dan saluran sedia ada. Ini bertujuan bagi mengelakkan kesesakan di pusat-pusat mengundi.

**iv. Pemansuhan syarat undi pos luar negara**

Syarat-syarat kelayakan pengundi pos Kategori 1B (Luar Negara) seperti yang dilaksanakan pada PRU ke-14 telah dimansuhkan iaitu:

- a. bermastautin di luar negara kecuali di Wilayah Selatan Thailand (Narathiwat, Pattani, Yala, Songkhla dan Satun), Singapura, Brunei dan Kalimantan, Indonesia; dan
- b. pernah berada di Malaysia atau kembali ke Malaysia tidak kurang daripada 30 hari dalam tempoh lima (5) tahun sebelum tarikh pembubaran Dewan Negeri yang sedang berkuat kuasa.

Dengan pemansuhan syarat-syarat ini, warganegara Malaysia yang berada di luar negara dan merupakan pemilih berdaftar adalah layak untuk memohon sebagai pengundi pos. Di samping itu permohonan undi pos bagi kategori 1B dan 1C kini boleh dibuat secara atas talian apabila permohonan dibuka oleh SPR.

Selain itu, SPR dengan kerjasama pihak Suruhanjaya Pencegahan Rasuah Malaysia (SPRM) dan Polis Diraja Malaysia (PDRM) memandang serius atas kesalahan dan pelanggaran undang-undang pilihan raya yang berlaku sebelum, semasa dan selepas tempoh berkempen oleh mana-mana parti atau mana-mana calon. Sebarang aduan kesalahan dan pelanggaran undang-undang pilihan raya yang dibuat sewajarnya diajukan kepada pihak SPRM dan PDRM untuk tindakan susulan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 3 OKTOBER 2022 (ISNIN)**

**SOALAN:**

minta **PERDANA MENTERI** menyatakan sama ada Kerajaan bercadang untuk menjadikan pekerja kontrak pembersihan sekolah dan hospital sebagai kakitangan Kerajaan sepertimana yang wujud sebelum perkhidmatan pembersihan diswastakan.

**JAWAPAN**

**DIJAWAB OLEH YB DATUK DR ABD LATIFF AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Pekerja kontrak yang dimaksudkan oleh pihak YB adalah pekerja yang diambil bekerja oleh syarikat-syarikat swasta yang mendapat kontrak Kerajaan untuk menjalankan atau memberikan perkhidmatan seperti khidmat pembersihan dan khidmat kawalan keselamatan di premis-premis Kerajaan seperti di sekolah dan hospital. Sehubungan itu, Kerajaan tidak berhasrat untuk menyerap para pekerja kontrak ini ke dalam perkhidmatan awam memandangkan mereka adalah pekerja swasta.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SERI TIONG KING SING  
[ BINTULU ]**

**TARIKH : 3 OKTOBER 2022 (ISNIN)**

**SOALAN :**

Minta **PERDANA MENTERI** menyatakan:

- i. Persediaan Kerajaan dalam menangani bencana banjir pada akhir tahun; dan
- ii. Langkah-langkah pihak Kerajaan untuk mengatasi banjir kilat yang kerap kali berulang di seluruh negara.

**JAWAPAN**

**DIJAWAB OLEH YB DATUK DR ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

**Persediaan Menangani Bencana Banjir**

1. Sebagai langkah persediaan menghadapi bencana banjir sewaktu musim Monsun Timur Laut (MTL) 2022/2023, Mesyuarat Jawatankuasa Pengurusan Bencana Pusat (JPBP) Bilangan 2 Tahun 2022 telah diadakan pada 12 September 2022 yang dipengerusikan oleh YAB Perdana Menteri.
2. Memandangkan Jawatankuasa Pengurusan Bencana Daerah (JPBD) mempunyai fungsi penting untuk menguruskan bencana di lokaliti masing-masing, maka JPBP telah mengarahkan supaya JPBD diaktifkan dengan kadar segera bagi menghadapi sebarang kemungkinan berlakunya bencana khususnya banjir.
3. Bagi memantau persiapan JPBN dan JPBD untuk memastikan ianya berada pada tahap optimum, YBhg. Tan Sri Ketua Setiausaha Negara akan mempengerusikan *Task Force* Persediaan Menghadapi MTL 2022/2023. Mesyuarat *Task Force* akan diadakan secara berkala sehingga MTL bermula dan akan dihadiri oleh Kementerian, Agensi Teknikal, Agensi Tindak Balas dan semua Jawatankuasa Pengurusan Bencana Negeri (JPBN).
4. Dalam pada itu, secara keseluruhannya seramai 76,336 pegawai dan anggota agensi tindak balas di semua peringkat berada dalam keadaan siap siaga sepenuhnya dengan pelbagai aset berjumlah 22,622 meliputi aset darat, air, udara, perubatan dan lain-lain.
5. Dari aspek pemantauan dan amaran awal, pihak Jabatan Pengairan dan Saliran (JPS) telah membuat persiapan melalui dua kaedah iaitu struktur dan bukan struktur. Langkah struktur

melibatkan projek tebatan banjir yang merangkumi komponen seperti pemuliharaan sungai untuk mengurangkan risiko banjir, penggunaan pam bergerak, menaik taraf infrastruktur mekanikal dan elektrik serta pembinaan kolam takungan banjir.

6. Manakala bagi langkah bukan struktur pula, ianya merangkumi kerja-kerja menaik taraf stesen siren amaran banjir dan stesen kamera web untuk mengumpul dan memproses data hidrologi bagi tujuan ramalan dan amaran banjir. Siren amaran dinaik taraf dari segi bunyi dan akan disekalikan dengan pengumuman sekiranya berlaku banjir di kawasan titik panas (*hotspot*) terutamanya di kawasan penempatan. Sesi libat urus dan ujian siren amaran juga telah dilaksanakan bersama penduduk di beberapa kawasan.
7. Bagi aspek pengurusan mangsa, Jabatan Kebajikan Masyarakat (JKM) telah bersiap sedia untuk mengaktifkan 6,010 Pusat Pemindahan Sementara (PPS) di seluruh negara yang mempunyai kapasiti untuk menempatkan 1,620,855 mangsa. Kementerian Pendidikan Malaysia (KPM) juga telah diarah supaya membenarkan penggunaan asrama-asrama sekolah yang tidak dihuni pelajar ketika bencana berlaku untuk dijadikan PPS.
8. Pihak JKM juga telah bersedia memaksimumkan fasiliti penyimpanan bantuan bencana di seluruh negara bermula pada bulan September dan Oktober di lapan buah Depot Simpanan Keperluan Bencana (DSKB), 140 buah stor bencana di negeri dan daerah termasuk 53 buah mini depot (kontena). Bagi memastikan bekalan barang keperluan bencana mencukupi terutamanya di kawasan yang berisiko tinggi terputus hubungan, sebanyak 518 buah pangkalan hadapan juga telah disediakan.
9. Bagi mengatasi isu penyediaan makanan kepada mangsa di peringkat awal pembukaan PPS, JKM akan menyediakan makanan *retort* untuk 24 jam pertama sebagai kaedah penyediaan makanan dengan kadar segera memandangkan kesukaran untuk membuat unjuran sebenar makanan bermasak di awal pembukaan PPS berikutan kemasukan mangsa secara berperingkat serta proses pemindahan yang tidak tentu masa.



10. Selain itu, Agensi Pengurusan Bencana Negara (NADMA) dalam proses untuk mengagihkan sebanyak 62,500 unit kit makanan untuk diagihkan kepada mangsa di PPS. NADMA juga telah mengagihkan sebanyak 127,272 buah *Collapsible Tent* (C-Tent) di seluruh negara. Terkini, NADMA telah menerima sumbangan C-Tent sebanyak 103,000 unit daripada Yayasan Sultan Ibrahim.
11. JPBN dan JPBD telah diarahkan untuk memastikan bantuan bekalan sampai di semua lokasi yang terlibat bagi mengelakkan keadaan lebih sukar sekiranya jalan terputus dan sebagainya.

Langkah-Langkah Kerajaan Untuk Mengatasi Banjir Kilat di Seluruh Negara

12. Bagi mengatasi isu banjir kilat, terdapat empat langkah yang sedang dan akan dilaksanakan oleh pihak JPS bagi menguruskan banjir kilat dengan lebih efektif iaitu:
  - i. Manual Saliran Mesra Alam (MSMA) yang lebih mampan dengan meliputi tiga aspek iaitu pengurusan air hujan di bandar dan luar bandar, pewujudan garis panduan bagi lain-lain industri (seperti perlombongan, pembalakan/perhutanan, pertanian dan perladangan, dan pengkuarian) serta garis panduan bagi pengurusan air hujan melibatkan kawasan tanah rendah, pembangunan linear/jalan, lereng bukit dan pulau. Selain itu, elemen perubahan iklim dan peningkatan paras air laut akan diterapkan ke dalam MSMA juga;
  - ii. Pelan Induk Saliran Mesra Alam (PISMA) telah siap sepenuhnya bagi 28 buah kawasan manakala tujuh masih dalam pelaksanaan dengan baki 10 dalam perancangan;
  - iii. Pembangunan Sistem Ramalan dan Amaran Banjir Kilat yang diintegrasikan dengan Program Ramalan dan Amaran Banjir (PRAB). Projek ini dijangka bermula pada Oktober 2022 dan akan siap sepenuhnya pada tahun 2025; dan

- iv. JPS bersama dengan Jabatan Meteorologi Malaysia (MET Malaysia) bekerjasama dengan *World Meteorological Organization* (WMO) dan *Hydrologic Research Centre* (NRC), Amerika Syarikat akan membangunkan *Flash Flood Guidance System* (FFGS) di Malaysia. Projek ini adalah di bawah SAOFFGS yang bermula semenjak tahun 2017 melibatkan beberapa buah negara di Asia Tenggara (Malaysia, Indonesia, Filipina, Brunei dan Timor Leste). Sistem FFGS khusus untuk Malaysia akan dibangunkan bersama pihak WMO dan HRC dan akan dimulakan setelah mendapat kelulusan Jemaah Menteri.
13. Kementerian Perumahan dan Kerajaan Tempatan (KPKT) telah mewujudkan Jawatankuasa Bagi Mengatasi Masalah Banjir Kilat pada 17 Jun 2021 yang diketuai oleh Jabatan Kerajaan Tempatan (JKT) dan dianggotai oleh pelbagai agensi seperti JPS, Jabatan Kerja Raya (JKR) dan Pejabat Setiausaha Kerajaan (SUK) Negeri.
14. Jawatankuasa ini telah mengambil kira masalah dan punca banjir kilat seperti sistem perparitan yang uzur, rosak dan tidak sistematik. Jawatankuasa ini juga telah menyediakan draf pelan tindakan bagi mengatasi masalah banjir di kawasan Pihak Berkuasa Tempatan (PBT) bagi tempoh lima tahun (2021-2025) untuk dilaksanakan oleh JKT, JPS, JKR, SUK Negeri dan PBT.
15. Bagi mengelakkan banjir di kawasan tapak projek, tindakan penguatkuasaan akan dipertingkatkan di peringkat PBT bagi kawalan hakisan dan enapan di tapak projek mengikut panduan yang dihariskan di dalam MSMA JPS.
16. Semua keperluan teknikal dan langkah mitigasi bagi menyediakan sistem perparitan teratur dalam Pelan Kebenaran Merancang (KM) dan keperluan reka bentuk kejuruteraan dalam Pelan Jalan dan Parit telah digariskan di dalam Manual *One Stop Centre* (OSC) 3.0 *Plus*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB TAN SRI HAJI IDRIS BIN JUSOH (BESUT)**

**TARIKH : 03 OKTOBER 2022 (ISNIN)**

**SOALAN**

**TAN SRI HAJI IDRIS BIN JUSOH [BESUT]** minta **MENTERI KANAN KERJA RAYA** menyatakan langkah-langkah Kementerian dalam menangani isu diancam projek-projek terbengkalai akibat kenaikan kos bahan mentah dan import serta kekurangan tenaga buruh asing.

**JAWAPAN**

Tuan Yang Di-Pertua,

Kementerian mengambil maklum mengenai kenaikan harga bahan binaan di pasaran berikutan kesan pandemik COVID-19 di seluruh dunia.

Untuk makluman Ahli Yang Berhormat, berdasarkan rekod Jabatan Kerja Raya Malaysia pada September 2022, terdapat 47 projek yang mengalami kelewatan dan 37 projek dikategori sebagai projek sakit. Walau bagaimanapun, selain faktor kenaikan harga bahan binaan, pelaksanaan Perintah Kawalan Pergerakan (PKP) mulai Mac 2022 yang menyebabkan penangguhan kerja di tapak bina turut menyumbang kepada kesulitan penyampaian projek mengikut jadual yang ditetapkan.

Antara tindakan yang telah diambil untuk menangani masalah kenaikan kos bahan binaan, Kerajaan melalui Kementerian Kewangan (MOF) telah melaksanakan Syarat Perubahan Harga atau *Variation of Price (VOP)* dalam kontrak kerja demi memastikan projek Kerajaan tidak terjejas dan dapat disiapkan mengikut jadual. Pelaksanaan Syarat Perubahan Harga ini dikuatkuasakan melalui Pekeliling Perbendaharaan PK 2.4 'Pelaksanaan Syarat Perubahan Harga (Variation Of Price – VOP) dalam Kontrak Kerja (Pindaan 1 Mei 2022) yang berkuatkuasa mulai berkuatkuasa mulai 1 Januari 2021 hingga 30 Jun 2022.

Untuk meringankan lagi bebanan kewangan pemain industri binaan, Kerajaan melalui MOF telah menambahbaik Pekeliling Baharu PK 2.4 'Pelaksanaan Syarat Perubahan Harga (Variation Of Price – VOP) dan Inisiatif Tambahan Kerajaan Pasca Pandemik dalam Kontrak Kerja Kerajaan (Pindaan pada 15 Julai 2022)' melibatkan skop kerja berikut:

i) Kerja-kerja Kejuruteraan Awam

Pelaksanaan perubahan harga diperluaskan kepada semua jenis bahan binaan seperti yang dikeluarkan dalam Siaran Khas 1 oleh DOSM.

Pengiraan perubahan harga adalah berasaskan kepada perubahan harga unit bagi sebelas (11) bahan binaan.

ii) Kerja-kerja Binaan Bangunan

Pelaksanaan perubahan harga diperluaskan kepada lima belas (15) bahan binaan terpilih yang digunakan dalam lapan (8) kategori bangunan mengikut kawasan seperti yang dikeluarkan dalam Siaran Khas 2 oleh DOSM. Pengiraan perubahan harga adalah berasaskan kepada perubahan Indeks Kos Lima belas (15) Bahan Binaan Bangunan termasuk bar keluli.

iii) Kerja-Kerja Mekanikal dan Elektrikal

Pengiraan perubahan harga adalah berasaskan kepada Indeks Kos Komponen mengikut tujuh (7) kategori komponen utama seperti yang dikeluarkan dalam Siaran Khas 3 oleh DOSM.

Syarat perubahan harga bagi pelawaan secara sebut harga dan tender adalah termasuk Kerja-kerja Binaan Bangunan, Kerja-kerja Kejuruteraan Awam dan Kerja-kerja Mekanikal dan Elektrikal yang masih dalam pembinaan pada 1 Januari 2021 dan diberikan kepada projek yang mana Surat Setuju Terima (SST) dikeluarkan sehingga 30 Jun 2022. Pekeliling 2.4 ini berkuat kuasa sehingga 30 Jun 2023 sahaja iaitu bagi memuktamadkan Perjanjian Tambahan. Namun yang demikian, pelaksanaan VOP bagi projek yang tertakluk kepada VOP adalah sehingga kontrak tamat.

Melalui Pekeliling 2.4 ini juga, beberapa kemudahan khas VOP dan inisiatif tambahan telah diluluskan oleh Kerajaan bagi membantu kontraktor melaksanakan kontrak kerja Kerajaan pasca pandemik sepertimana berikut:

a) Pembayaran kemajuan interim hendaklah lebih kerap iaitu dua (2) kali sebulan;

- b) Penamatan Bersama kontrak boleh ditamatkan secara persetujuan bersama atas permintaan kontraktor;
- c) Pelanjutan masa (EOT) dibenarkan bagi tempoh maksimum enam (6) bulan dari tempoh terakhir EOT tertakluk pada pertimbangan P.P. dengan permohonan oleh kontraktor;
- d) Pelepasan Bon Pelaksanaan/Wang Jaminan Pelaksanaan (WJP) sehingga 50% dari jumlah keseluruhan bagi projek dengan kemajuan kerja melebihi 60%;

Pelaksanaan kemudahan khas dan inisiatif ini tertakluk kepada syarat – syarat yang telah dinyatakan dalam Pekeliling tersebut.

Tuan Yang Di-Pertua,

Pihak Kementerian Kerja Raya (KKR) sememangnya bertindak secara proaktif bagi menyelesaikan isu kekurangan tenaga kerja yang dihadapi oleh pemain industri pada masa ini. Bagi tujuan ini, pihak KKR sentiasa memberikan kerjasama dan sokongan yang penuh terhadap polisi-polisi yang dirangka oleh pihak Kementerian Sumber Manusia (KSM). Ini dilaksanakan melalui penguatkuasaan Akta Lembaga Pembangunan Industri Pembinaan Malaysia 1994 (Akta 520) serta pematuhan kepada Akta Standard Minimum Perumahan, Penginapan dan Kemudahan Pekerja 1990 (Akta 446) dan Akta Kerja 1955 (Akta 265).

Sebagai usaha untuk mempercepatkan urusan pengambilan pekerja asing sektor pembinaan, KKR melalui Lembaga Pembangunan Industri Pembinaan Malaysia (CIDB) telah bertindak membantu KSM untuk menyemak permohonan tenaga buruh asing seterusnya membuat pengesyoran kuota yang diperlukan. CIDB telah menempatkan pegawai untuk menyemak dan memproses permohonan setiap hari kecuali hari

Jumaat. CIDB sentiasa bersedia untuk menambah pegawai penemuduga untuk bertugas di Pusat Kelulusan Setempat KSM bagi mempercepatkan proses kelulusan di pihak KSM.

Sebagai langkah penyelesaian jangka masa panjang, pihak KKR melalui 6 agensi dibawahnya juga telah melaksanakan pelbagai inisiatif bagi meningkatkan penggunaan teknologi dalam sektor pembinaan yang pada akhirnya diharapkan akan mengurangkan kebergantungan terhadap tenaga kerja asing. Antara usaha yang telah dimulakan adalah melalui Jabatan Kerja Raya (JKR) dimana pihak JKR telah mewajibkan penggunaan kaedah IBS bagi semua projek bangunan JKR yang bernilai RM10juta dan ke atas dengan kadar minimum 70 skor IBS.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**  
**DARIPADA : YB TUAN TAN KOK WAI [ CHERAS ]**  
**TARIKH : 3 OKTOBER 2022 (ISNIN)**

**SOALAN**

Minta **MENTERI SAINS, TEKNOLOGI DAN INOVASI** menyatakan sama ada Amerika Syarikat menjemput Malaysia untuk menyertai program Artemis serta pendirian Kerajaan mengenai program Artemis ini.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Program Artemis Accords yang diterajui oleh *National Aeronautics and Space Administration (NASA)*, Amerika Syarikat adalah merupakan program penerokaan angkasa antarabangsa untuk tujuan aman termasuk penghantaran angkasawan wanita pertama ke Bulan pada tahun 2024 sebagai persiapan dalam misi penghantaran manusia ke Marikh. Satu perjanjian Artemis telah diwujudkan NASA pada tahun 2020 sebagai panduan aktiviti kerjasama yang akan dilaksanakan melalui perjanjian dua hala serta menjelaskan mengenai peruntukan perundangan dan tanggungjawab negara yang menyertai program ini.

2. Cadangan program ini telah diumumkan semasa *58th Session of the Scientific and Technical Subcommittee (STSC), United Nations Committee on the Peaceful Uses of Outer Space (UNCOPUOS)* pada April 2021. **Program ini dibuka kepada semua negara termasuk Malaysia** untuk terlibat di semua peringkat perancangan, reka bentuk, pembangunan, pelaksanaan dan pengoperasian fasiliti dan penglibatan dalam penyelidikan yang akan dilaksanakan.



3. Sehingga Mei 2022, sebanyak 21 negara telah menandatangani perjanjian ini yang menunjukkan komitmen dan pematuhan kepada *Outer-Space Treaty* 1967. Antara negara yang telah menandatangani program Artemis Accords ini adalah Australia, Kanada, Itali, Jepun, Luxembourg, United Arab Emirates, United Kingdom dan Singapura.

4. Pada 26 Julai 2022, pihak NASA melalui *ASEAN Secretariat* (ASEC) telah mengadakan satu pembentangan melalui webinar berkenaan NASA Artemis Accords kepada semua peserta *ASEAN-US Consultation on Science and Technology* termasuk Malaysia. Buat masa ini, Kerajaan sedang meneliti pelbagai aspek seperti implikasi kewangan dan kelebihan yang menguntungkan negara sebelum menandatangani kerjasama atau menyertai inisiatif Artemis Accords, mahupun program seumpamanya.

Tuan Yang di-Pertua,

5. Memandangkan program ini melibatkan aktiviti-aktiviti penerokaan di angkasa, maka negara perlu mempunyai dan menguatkuasakan akta angkasa domestik bagi mengawal selia aktiviti angkasa sebelum menyertai aktiviti-aktiviti berkenaan bagi memastikan pematuhan perundangan yang telah dipersetujui di peringkat antarabangsa. Oleh itu, Kerajaan telahewartakan Akta Lembaga Angkasa Malaysia 2022 (*Akta 834*) pada 25 Januari 2022 dan dikuatkuasakan pada 4 Ogos 2022. Selain itu, negara juga perlu meratifikasi konvensyen dan perjanjian angkasa antarabangsa berkaitan angkasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN CHOW KON YEOW [TANJONG]**

**TARIKH : 3 OKTOBER 2022 (ISNIN)**

**SOALAN**

**TUAN CHOW KON YEOW [TANJONG]** minta **PERDANA MENTERI** menyatakan dasar dan pendekatan yang dirancang untuk terus memperkasakan Perbadanan Kemajuan Ekonomi Negeri (PKEN) bagi memacu pertumbuhan ekonomi setiap negeri. Perincikan apakah projek/program yang telah dilaksanakan/dirancang berserta kos bagi setiap negeri sejak 2018 hingga 2023.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Perbadanan Kemajuan Ekonomi Negeri (PKEN) telah diwujudkan untuk meningkatkan keseimbangan ekonomi di setiap negeri. Secara prinsipnya, peranan PKEN adalah untuk menggalakkan pertumbuhan ekonomi di setiap negeri, memacu pembangunan industri sekali gus menambah baik kualiti hidup rakyat di setiap negeri.

2. Sepanjang tempoh tahun 2018-2022, Kerajaan telah memperuntukkan sebanyak RM885.12 juta kepada PKEN di mana jumlah ini menunjukkan trend peningkatan setiap tahun. Sebahagian besar peruntukan ini disalurkan untuk projek-projek pembangunan terutamanya pembangunan infrastruktur, pembangunan hartanah dan industri. Bagi

tahun 2023, peruntukan akan diumumkan semasa pembentangan Belanjawan 2023.

3. Antara PKEN yang telah menerima peruntukan sepanjang tempoh tersebut adalah seperti:

- i. Johor Corporation (JCorp) dengan jumlah peruntukan sebanyak RM26.37 juta bertujuan untuk pembangunan kilang di kawasan perindustrian Pasir Gudang, Johor;
- ii. Perbadanan Kemajuan Negeri Kedah (PKNK) menerima peruntukan sebanyak RM15.30 juta khusus untuk membiayai pembangunan infrastruktur di Bukit Kayu Hitam, Kedah;
- iii. Perbadanan Kemajuan Iktisad Negeri Kelantan (PKINK) telah menerima sebanyak RM17.50 juta bagi membangunkan kawasan industri kecil di Pengkalan Chepa, Kelantan;
- iv. Perbadanan Pembangunan Negeri Sabah (SEDCO) sebanyak RM20.93 juta yang bertujuan untuk pembangunan industri kecil di Sepanggar, Sabah; dan
- v. Perbadanan Memajukan Iktisad Negeri Terengganu (PMINT) turut menerima peruntukan daripada Kerajaan Persekutuan sebanyak RM13.14 juta yang digunakan untuk pembinaan unit kilang berkembar di Gong Badak, Kuala Nerus, Terengganu.

4. Kerajaan Persekutuan telah meningkatkan peruntukan kepada PKEN untuk tahun 2021 dan 2022 masing-masing berjumlah RM255.61 juta dan RM283.71 juta berbanding tahun-tahun sebelum ini. Peningkatan peruntukan ini bagi membolehkan PKEN merencanakan semula aktiviti perniagaannya pasca pandemik Covid-19 yang melanda seluruh dunia sebelum ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
(PONTIAN)**

**TARIKH : 3 OKTOBER 2022  
(ISNIN)**

**SOALAN**

Minta **MENTERI KANAN PERTAHANAN** menyatakan projek-projek pembinaan dan kontrak besar yang berjaya dilaksanakan untuk manfaat anggota tentera dan keselamatan negara sejak 10 tahun kebelakangan ini. Senarai diperlukan untuk mengimbangi persepsi negatif berhubung isu LCS.

**JAWAPAN**

Tuan Yang di-Pertua,

Kementerian Pertahanan sentiasa memastikan perolehan aset pertahanan negara adalah seiring dengan pembangunan teknologi pertahanan dunia. Kementerian Pertahanan juga komited untuk terus membangunkan infrastruktur pertahanan dan menaik taraf aset-aset strategik pertahanan negara supaya kesiagaan pertahanan negara berada pada tahap yang tinggi seperti yang telah digariskan dalam Kertas Putih Pertahanan (KPP).

Bagi perolehan aset-aset strategik pertahanan, ianya turut merangkumi pelbagai peralatan dan kelengkapan pertahanan darat, laut, udara dan peralatan komunikasi. Kementerian Pertahanan telah melaksanakan projek-projek perolehan bernilai besar dan berimpak tinggi dengan kos keseluruhannya sebanyak RM7.41 bilion bagi tempoh 10 tahun kebelakangan ini seperti :

1. Perolehan 4 buah *Littoral Mission Ship* (LMS) untuk kegunaan Tentera Laut Diraja Malaysia (TLDM);
2. Perolehan 12 buah helikopter EC725 AP untuk kegunaan Tentera Udara Diraja Malaysia (TUDM);
3. Perolehan 6 buah helikopter MD530G untuk kegunaan Tentera Darat Malaysia (TDM);
4. Perolehan 18 unit meriam 105mm *Pack Howitzer* untuk kegunaan Tentera Darat Malaysia (TDM);
5. Pembekalan 6 buah *Fast Interceptor Craft* untuk kegunaan Tentera Laut Diraja Malaysia (TLDM);
6. Pembekalan 11 buah *Rigid Hull Inflatable Boats* untuk kegunaan Tentera Laut Diraja Malaysia (TLDM);
7. Pembekalan 4 buah *Multipurpose Boat* untuk kegunaan Tentera Laut Diraja Malaysia (TLDM);
8. Kontrak *The Supply Of Articles, Services And Technical Assistance Of Alenia Aermacchi MB-339 Aircraft* untuk kegunaan Tentera Udara Diraja Malaysia (TUDM); dan
9. Perolehan 4 buah pesawat Airbus A400M untuk kegunaan Tentera Udara Diraja Malaysia (TUDM).

Selain itu, terdapat juga kontrak-kontrak perkhidmatan penyelenggaraan, pembekalan alat ganti bagi pesawat Airbus, Hawk, F/A18D dan perolehan perkhidmatan yang lain bagi memastikan kesinambungan operasi aset strategik pertahanan negara.

Bagi projek pembangunan infrastruktur pula, Kementerian Pertahanan telah menambah baik, mengemaskini serta meneruskan kesinambungan projek-projek berdasarkan keperluan semasa dan perancangan masa hadapan pihak Angkatan Tentera Malaysia (ATM).

Berdasarkan rekod 10 tahun kebelakangan ini, sebanyak 42 projek pembangunan infrastruktur telah berjaya disiapkan untuk manfaat warga ATM dan keselamatan negara dengan melibatkan kos keseluruhan sebanyak RM5.13 bilion. Bagi meningkatkan keupayaan dan kesiagaan pertahanan, projek-projek yang telah berjaya disiapkan adalah:

1. Infrastruktur Bagi Penempatan Dan Pengoperasian Pesawat A400M Di Pangkalan Udara Subang;
2. Kompleks Pusat Sektor Operasi (SOC3) Gunung Ngili; Sarawak;
3. Kompleks Pusat Sektor Operasi (SOC3) Fasa 2, Kota Samarahan, Sarawak;
4. Pusat Pengajian Pertahanan Nasional (PUSPAHANAS), Putrajaya;
5. Jeti Mawilla 2, Sandakan Sabah;
6. Markas Angkatan Bersama Sg. Panching, Kuantan, Pahang;
7. Garaj Utama Kenderaan 8x8 Dan Kenderaan Pasukan serta Infrastruktur di Kuantan, Pahang, Port Dickson, Negeri Sembilan dan Sungai Petani, Kedah;
8. Bangunan Dan Infrastruktur Pusat Operasi (SOC 1) Di TUDM Westrn Hill;
9. Makmal Marin Akademi Tentera Malaysia ATMA);
10. Bangunan Pejabat Baharu Jabatan Arah Rekod Dan Pencen (JRP);
11. United Nations Humanitarian Response Depot, Subang Selangor;
12. Kem Batalion 10 Rejimen Askar Melayu Diraja, Batu Pahat;
13. Bandar Tentera Darat Di Port Dickson, Negeri Sembilan;
14. Depot Peluru Dan Bangunan Simpanan Peluru Unit Tentera Darat Di Mempaga, Bentong, Pahang;
15. Kem Briged Sempadan Dan Kem 6 Skuadron Medan Jurutera, Oran, Perlis;
16. Pangkalan Kapal Selam Teluk Sepangar Kota Kinabalu Sabah;

17. Infrastruktur Pesawat Su-30MKM Di Pangkalan Gong Kedak (Fasa 1);
18. Pangkalan Tentera Laut Diraja Malaysia (TLDM) Teluk Sepang, Kota Kinabalu Sabah;
19. Kemudahan Infrastruktur Jeti Operasi Lumut;
20. Infrastruktur Pesawat Su-30MKM Di Pangkalan Gong Kedak (Fasa 2); dan
21. Pusat Servis Teknikal Bagi Penyelenggaraan Dan Pembaikan Pesawat Su30MKM Untuk TUDM Di Pangkalan Udara Gong Kedak.

Bagi melestarikan kesejahteraan warga kerja pertahanan, projek-projek Rumah Keluarga Angkatan Tentera (RKAT), Rumah Keluarga Malaysia Angkatan Tentera (RKMAT), kemudahan kesihatan dan sosial yang telah berjaya disiapkan adalah:

1. RKMAT Kem Semenggo, Sarawak (223 unit);
2. RKMAT Tentera Darat (TD), Bukit Jalil (2,000 unit);
3. RKMAT Kem Segamat, Johor (305 unit);
4. RKAT Pangkalan Udara Sendayan (693 unit);
5. RKAT Pangkalan Udara Subang (617 unit);
6. RKAT Pangkalan Udara Kuantan (138 unit);
7. RKMAT Kem Oran, Perlis (20 unit);
8. RKMAT Kem Sri Miri Fasa 2, Sarawak (78 unit);
9. RKMAT Kem Tok Jalai, Kedah (65 unit);
10. RKMAT Kem Pakit, Sarawak (204 unit);
11. Naiktaraf dan baik pulih Kem-Kem Tentera Darat di seluruh negara;

12. Institut Kesihatan Angkatan Tentera (INSAN) Kem Terendak, Melaka;
13. Wisma Perwira ATM, Jalan Tekpi, Kuala Lumpur;
14. Wisma Bintara ATM, Jalan Padang Tembak, Kuala Lumpur;
15. Wisma Transit ATM, Jalan Buku Lima, Kuala Lumpur;
16. Poliklinik Kesihatan Kem Penrissen, Sarawak;
17. Perumahan Tentera Darat Batu Pahat, Johor;
18. Perumahan Kem KEMENTAH Kuala Lumpur;
19. Kompleks Rumah Sakit Angkatan Tentera (RSAT) Taiping, Perak;

Manakala bagi menambahbaik infrastruktur pembangunan sains & teknologi pertahanan, projek-projek yang telah berjaya disiapkan adalah Kompleks Institut Penyelidikan Sains dan Teknologi Pertahanan (STRIDE) Lumut, Perak dan Kompleks STRIDE, Kajang (Fasa 2).

Sebagai kesimpulan, Kementerian Pertahanan sentiasa memastikan semua projek pembinaan dan perolehan yang dilaksanakan adalah selaras dengan perancangan dan keperluan warga kerja pertahanan khususnya *end user* iaitu pihak Angkatan Tentera Malaysia (ATM) untuk manfaat semua anggota tentera seterusnya meningkatkan keupayaan dan kesiagaan dalam mempertahankan kedaulatan negara.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' RAMLI BIN DATO' MOHD NOR  
(CAMERON HIGHLANDS)**

**TARIKH : 03 OKTOBER 2022 (ISNIN)**

**SOALAN**

**DATO' RAMLI BIN DATO' MOHD NOR [CAMERON HIGHLANDS]** minta **MENTERI KANAN KERJA RAYA** menyatakan apakah tindakan yang dilakukan oleh pihak Kementerian dalam membaik pulih dan menyelenggara jalan raya dari kawasan perkampungan Belau ke Kampung Sinderut di Pos Sinderut di mana jalan raya tersebut didaftarkan di bawah MARRIS serta ianya tidak diselenggara dengan baik.

**JAWAPAN**

Tuan Yang Di-Pertua,

Untuk makluman Ahli Yang Berhormat, hasil semakan Kementerian ini mendapati **jalan raya dari kawasan perkampungan Belau ke Kampung Sinderut di Pos Sinderut** adalah merupakan **Jalan Negeri**.

Projek berkenaan telah dilaksanakan di bawah peruntukan Kementerian Pembangunan Luar Bandar dengan kos kontrak bernilai RM32 juta sepanjang 30 km itu telah siap pada Oktober 2016. Jalan ini telah diserahkan kepada JKR Negeri Pahang dan diselenggara bawah peruntukan MARRIS.

Oleh yang demikian pihak yang **bertanggungjawab untuk memantau dan menyelenggara laluan tersebut** adalah di bawah bidang kuasa **Kerajaan Negeri** dan di luar bidang kuasa Kementerian Kerja Raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB PROF. MADYA PUAN RUSNAH BINTI  
ALUAI (TANGGA BATU)**

**TARIKH : 03 OKTOBER 2022 (ISNIN)**

**SOALAN**

**PROF. MADYA PUAN RUSNAH BINTI ALUAI [TANGGA BATU]** minta **MENTERI KANAN KERJA RAYA** menyatakan bilakah lampu sepanjang Lebuhraya SPA terutamanya di kawasan Krubong dari Sungai Udang menghala ke Cheng akan dipasang kerana laluan yang gelap telah akan menyebabkan kemalangan jiwa dan menyusahkan penduduk.

**JAWAPAN**

Tuan Yang Di-Pertua,

Untuk makluman Ahli Yang Berhormat, Kementerian ini mengambil perhatian terhadap jalan-jalan di kawasan gelap yang boleh mengundang risiko bahaya kepada pengguna jalan raya. Kementerian ini telah dan sedang melaksanakan kerja pemasangan lampu jalan di Jalan Persekutuan yang berisiko kemalangan akibat jalan gelap di seluruh Malaysia melalui Program Menaiktaraf Infrastruktur Keselamatan Jalan Raya. Peruntukan yang disediakan di bawah program ini adalah terhadap, sehubungan itu Kementerian telah menetapkan kriteria skop pemasangan di kawasan persimpangan, selekoh berbahaya, aduan awam, kawasan jambatan dan juga kawasan yang mempunyai jumlah kemalangan yang tinggi sahaja.

Untuk makluman Ahli Yang Berhormat, Lebuhraya SPA FT33 (Sungai Udang – Air Keroh) merupakan Jalan Persekutuan R4 sepanjang 23.10km dan mempunyai 4 lorong (jalan berkembar). Sebahagian laluan ini telah pun mempunyai lampu jalan, namun sebahagian kawasan lain masih belum mempunyai lampu jalan.

Justeru, Kementerian ini telah membuat perancangan pada tahun 2023 di bawah program seperti yang dinyatakan bagi pemasangan lampu jalan baharu di kawasan yang telah dikenalpasti menepati kriteria pemasangan lampu jalan. Antara lokasi yang telah dikenalpasti ialah di seksyen 17.7 antara persimpangan Taman Tasik hingga sebelum susur ke Tol Ayer Keroh dan seksyen 8.70 Paya Mas, Paya Rumput. Sebagai tambahan, Kementerian ini juga telah merancang untuk melaksanakan kerja penyelenggaraan lampu jalan sedia ada di kawasan berkenaan.

Sekian, terima kasih.

**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGGAL KELIMA,  
PARLIMEN KE-14**

**PERTANYAAN : LISAN**

**DARIPADA : DATUK ROBERT LAWSON CHUAT [BETONG]**

**TARIKH : 3 OKTOBER 2022 (ISNIN)**

**SOALAN**

**DATUK ROBERT LAWSON CHUAT [BETONG]** minta **MENTERI KOMUNIKASI DAN MULTIMEDIA** menyatakan apakah program dan inisiatif Kementerian bagi menyediakan latihan serta peluang masyarakat terlibat dalam ekonomi digital serta memacu pertumbuhan ekonomi digital di luar bandar.

**JAWAPAN**

Tuan Yang di-Pertua,

Bagi menyediakan peluang kepada rakyat secara umumnya termasuk golongan di luar bandar untuk memanfaatkan ekonomi digital, Kementerian Komunikasi dan Multimedia (K-KOMM) melalui agensinya Malaysia Digital Economy Corporation (MDEC) telah melaksanakan program-program kemahiran dan pengetahuan dalam bidang ekonomi digital termasuk dalam menjana pendapatan melalui platform ekonomi digital serta kemahiran digital diperingkat sekolah. Berikut adalah program-program yang dilaksanakan oleh MDEC:

- (i) Program eRezeki yang menyediakan platform digital bagi membantu memprofil, melatih dan memadankan golongan B40 dan M40 dengan peluang-peluang tugas atau pekerjaan daripada platform-platform digital yang mengguna pakai model ekonomi perkongsian atau ekonomi *gig*;
- (ii) Program *Global Online Workforce* atau GLOW yang menyasarkan golongan yang berkemahiran dan berkeelayakan dalam bidang-bidang tertentu untuk menjana pendapatan tinggi secara digital. Menerusi program ini, latihan dan bimbingan diberikan untuk memperkasakan peserta agar mereka mampu menjana pendapatan bernilai tinggi secara “*online*” dan “*remotely*”, hasil daripada penawaran perkhidmatan profesional mereka kepada klien tempatan dan antarabangsa;
- (iii) Program eUsahawan yang dilaksanakan melalui latihan pembelajaran secara luar dan dalam talian untuk melatih individu, pelajar dan usahawan mikro berkenaan ilmu keusahawanan digital bagi menjana pendapatan, menjalankan pemasaran produk dan meningkatkan penjualan;
- (iv) PeDAS ialah program yang dilaksanakan untuk membantu perusahaan mikro, kecil dan sederhana (PMKS) luar bandar mahupun miskin bandar bagi memasarkan produk mereka melalui

## SOALAN NO: 21

platform e-Dagang. Dengan slogan 'Satu Klik, Sejuta Peluang', PeDAS kini ditawarkan di Pusat Ekonomi Digital Keluarga Malaysia (PEDi) yang dikenal pasti untuk memberi peluang dan ruang kepada PMKS luar bandar serta komuniti di kawasan miskin bandar bagi mengasah kemahiran dalam perniagaan e-Dagang dan seterusnya mengguna pelbagai aplikasi dan peralatan digital untuk memperkembang perniagaan mereka;

- (v) Kempen Jualan Murah Keluarga Malaysia@DE Dagang (JMKM@DE Dagang) merupakan satu inisiatif e-dagang kerajaan bertujuan untuk menggalakkan peniaga tempatan khususnya PMKS mengguna pakai platform-platform digital bagi meluaskan pasaran dan meningkatkan perniagaan mereka; dan
- (vi) Program #mydigitalmaker yang bertujuan untuk mendekatkan generasi muda terutama murid sekolah dari dalam dan luar bandar, untuk memahami teknologi seperti pengaturcaraan dan pembuatan 3D agar dapat memupuk minat serta kesedaran untuk mereka meneroka dan seterusnya merangsang idea baru dalam menghasilkan ciptaan inovasi digital.

Sekian, terima kasih.

**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN TEO NIE CHING [KULAI]**

**TARIKH : 3 OKTOBER 2022 (ISNIN)**

**SOALAN:**

**PUAN TEO NIE CHING [KULAI]** minta **MENTERI KOMUNIKASI DAN MULTIMEDIA** menyatakan bilangan peranti telah diagih di bawah program PerantiSiswa dan kosnya.

**JAWAPAN:**

Tuan Yang Dipertua,

Setakat 23 September 2022, seramai 2,764 mahasiswa daripada Kementerian Pengajian Tinggi, Kementerian Pendidikan Malaysia dan Kementerian Pelancongan, Seni dan Budaya Malaysia telah menerima PerantiSiswa Keluarga Malaysia. Jumlah keseluruhan kos bagi perolehan Inisiatif PerantiSiswa Keluarga Malaysia adalah sebanyak RM385,310,057.00 untuk pembekalan 350,000 unit tablet. Setiap tablet dibekalkan bersama aksesori tulen papan kekunci, pen *stylus*, *casing*, jaminan dua tahun, perkhidmatan sokongan pasca jualan, Platform Pengurusan Peranti dan Perisian Peranti Pengeluar (*Manufacturer's Device Management Software*).

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' HAJI MAHFUZ BIN HAJI OMAR  
(POKOK SENA)**

**TARIKH : 3 OKTOBER 2022 (ISNIN)**

**SOALAN**

Minta **MENTERI KANAN PERTAHANAN** menyatakan apakah tindakan lanjutan yang diambil Kerajaan terhadap kelemahan dan kecuaiian yang berlaku di dalam pelaksanaan projek perolehan kapal tempur pesisir (LCS) sebagaimana yang didedahkan dan ditimbulkan di dalam laporan PAC dan laporan Jawatankuasa Siasatan Tadbir Urus, Perolehan dan Kewangan Kerajaan.

**JAWAPAN**

Tuan Yang di-Pertua,

Segala kelemahan yang telah dikenal pasti dalam tatacara pengurusan semasa pelaksanaan perolehan *Littoral Combat Ship* (LCS) ini, sama ada hasil siasatan pihak Jawatankuasa Kira-Kira Wang Negara (PAC) dan Jawatankuasa Siasatan Tadbir Urus Perolehan dan Kewangan Kerajaan (JKSTUPKK) telah diambil kira bagi mengemaskini dan menambahbaik sistem perolehan Kementerian.

Secara umumnya, punca kuasa untuk pelaksanaan perolehan bagi Kementerian Pertahanan adalah berpandukan kepada Pekeliling Perolehan yang dikeluarkan oleh Kementerian Kewangan. Sebarang penganugerahan kontrak perolehan kepada sesebuah syarikat sama ada secara tender terbuka atau rundingan terus, Kementerian Pertahanan

perlu mematuhi syarat dan garis panduan yang telah ditetapkan di bawah Pekeliling Kerajaan 2.1, Kaedah Perolehan Kerajaan yang dikeluarkan oleh Kementerian Kewangan.

Bagi perolehan secara tender, Kementerian Kewangan juga telah menetapkan had nilai dan kuasa Lembaga Perolehan bagi setiap Kementerian untuk mempertimbang dan meluluskan tender di bawah nilai perolehan kontrak sebanyak RM50 juta sahaja. Bagi nilai kontrak perolehan melebihi RM50 juta, Kementerian Pertahanan perlu mengemukakan kepada Kementerian Kewangan untuk pertimbangan dan kelulusan. Manakala, bagi perolehan yang melibatkan rundingan terus, Kementerian Pertahanan perlu mendapatkan kelulusan Kementerian Kewangan terlebih dahulu sebelum proses seterusnya dapat dilaksanakan.

Selain itu, Kementerian Pertahanan sentiasa memastikan pematuhan peraturan kewangan semasa dikuatkuasakan sepenuhnya dalam setiap peringkat dan proses perolehan. Prosedur Operasi Standard (SOP) Pengurusan Perolehan Dalam Kementerian merupakan mekanisme tambahan yang diwujudkan untuk mencegah dan mengelak sebarang unsur penyelewengan daripada berlaku. Kementerian sentiasa melaksanakan kajian semula dan mengemas kini SOP Pengurusan Perolehan Dalam Kementerian supaya prosedur ini merangkumi dasar dan peraturan kewangan semasa yang berkuatkuasa.

Laporan Jawatankuasa Siasatan Tadbir Urus Perolehan dan Kewangan Kerajaan (JKSTUPKK) telah mengesyorkan beberapa perkara kepada Kementerian Pertahanan untuk memperkemaskan lagi pengurusan kontrak terhadap projek LCS ini. Oleh itu, Kementerian Pertahanan telah mengambil langkah penambahbaikan terhadap SOP perolehan Kementerian seperti berikut:

1. Membuat *Due Diligence* terhadap kedudukan kewangan syarikat yang dipilih untuk rundingan terus dan pihak pengguna atau *end-user* perlu mendapat perakuan daripada Ketua Perkhidmatan masing-masing dahulu sebelum proses rundingan dilaksanakan;

2. Bayaran kemajuan kontrak akan diperketatkan dimana Jadual Bayaran hendaklah diselarikan dengan kemajuan kerja yang dilaksanakan dan perlu dimasukkan ke dalam dokumen kontrak. Dokumen Kontrak ini hendaklah dipersetujui oleh Bahagian Undang-Undang Kementerian terlebih dahulu sebelum dimuktamadkan; dan
3. Tiada lagi elemen *capping* terhadap denda lewat bagi mengelakkan kerugian terhadap kerajaan. Perkara ini juga selari dengan arahan Kementerian Kewangan di mana Kementerian tidak dibenarkan melaksanakan elemen tersebut walaupun kadar kenaikan denda tertakluk kepada kaedah yang ditetapkan oleh Kementerian Pertahanan.

Pada masa yang sama, Kementerian Pertahanan juga telah membuat penambahbaikan dengan melaksanakan tender perolehan antarabangsa bagi aset pertahanan negara yang bernilai tinggi, sekiranya perolehan ini tidak boleh disediakan atau dikeluarkan oleh sumber dalam negara. Sebagai contoh, Kementerian telah melaksanakan tender perolehan antarabangsa bagi aset strategik pertahanan negara seperti *Medium Altitude Long Endurance Unmanned Aerial System, Fighter Lead Trainer – Light Combat Aircraft, Long Range Radar, Air Surveillance Radar* dan *Maritime Patrol Aircraft (MPA)*.

Dengan pengemaskinian dan penambahbaikan prosedur perolehan yang telah dilaksanakan oleh Kementerian Pertahanan ini, ianya akan meningkatkan akauntabiliti awam, ketelusan, persaingan secara terbuka, nilai faedah terbaik bagi aset yang diterima serta adil dan saksama kepada Kerajaan.

Sekian terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 3 OKTOBER 2022 (ISNIN)**

**SOALAN :**

minta **PERDANA MENTERI** menyatakan status terkini pengemaskinian sistem eKasih supaya bantuan disalurkan secara efektif kepada individu yang memerlukannya, dan status pembangunan Pangkalan Data Perlindungan Sosial merentasi Kementerian dan agensi Kerajaan yang mampu membantu Kerajaan dalam penyampaian program sosial secara strategik.

**JAWAPAN**

**DIJAWAB OLEH YB DATUK DR. ABD LATIFF BIN AHMAD,  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Unit Penyelarasan Pelaksanaan, Jabatan Perdana Menteri (ICU JPM) telah membangunkan Sistem eKasih pada tahun 2007 sebagai satu pangkalan data kemiskinan nasional yang bertujuan untuk mendaftarkan golongan miskin di Malaysia dan mengklasifikasikan kategori golongan miskin di Malaysia sama ada mereka tergolong dalam kalangan “Miskin Tegar dan Miskin” berdasarkan Pendapatan Garis Kemiskinan (PGK) sedia ada melalui proses verifikasi di lapangan.

2. Kriteria penetapan kategori kemiskinan adalah bergantung kepada jumlah pendapatan per kapita isi rumah dan berasaskan kepada formula perkiraan yang telah disediakan oleh pihak Unit Perancang Ekonomi dan juga Jabatan Perangkaan Malaysia melalui Penyiasatan Pendapatan Isi Rumah 2019 ataupun *Household Income Survey* 2019. Sebagai contoh, jika pendapatan per kapita KIR dalam lingkungan RM310 ke bawah, KIR tersebut dikategorikan sebagai Miskin Tegar. Walau bagaimanapun, data kemiskinan eKasih adalah bersifat dinamik dan sentiasa berubah.

3. Berdasarkan rekod eKasih, sehingga **15 September 2022**, seramai **434,197 Ketua Isi Rumah (KIR)** yang berdaftar di bawah Sistem eKasih di mana daripada jumlah tersebut, sebanyak **130,709 KIR** adalah berstatus Miskin Tegar manakala **303,488 KIR** berstatus Miskin. Pecahan mengikut negeri adalah seperti berikut:

**Statistik Status Kemiskinan eKasih Mengikut Negeri  
Sehingga 15 September 2022**

Negeri	Jumlah Besar		
	Miskin Tegar	Miskin	Jumlah
Johor	4,423	9,723	14,146
Kedah	11,882	17,053	28,935
Kelantan	13,539	58,565	72,104
Melaka	1,164	6,516	7,680
Negeri Sembilan	4,048	6,709	10,757
Pahang	5,651	8,992	14,643
Perak	8,320	24,727	33,047
Perlis	3,904	7,277	11,181
Pulau Pinang	5,425	12,456	17,881
Sabah	20,770	43,848	64,618
Sarawak	34,164	59,737	93,901
Selangor	8,594	15,887	24,481
Terengganu	5,713	26,398	32,111
WP Kuala Lumpur	2,604	3,756	6,360

<b>WP Labuan</b>	<b>508</b>	<b>1,797</b>	<b>2,305</b>
<b>WP Putrajaya</b>	<b>0</b>	<b>47</b>	<b>47</b>
<b>Jumlah</b>	<b>130,709</b>	<b>303,488</b>	<b>434,197</b>

4. Di samping itu, Pangkalan Data Perlindungan Sosial (PDPS) merupakan sebuah pangkalan data yang dibangunkan secara dalaman (*in-house*) bagi menyokong pemantapan agenda perlindungan sosial negara di bawah Majlis Perlindungan Sosial Malaysia (MySPC). Kerajaan juga telah pun melancarkan PDPS Fasa 1: Bantuan Sosial pada 23 Mac 2022 yang lalu dan pengguna awal bagi sistem PDPS ini terdiri daripada 17 agensi pelaksana/ pembekal data program Bantuan Sosial di peringkat persekutuan. Pada masa kini, pembangunan Modul Insurans Sosial dan Modul Intervensi Pasaran Buruh sedang dilaksanakan dan dijangka siap pada tahun 2024.

5. Bagi membantu kementerian/agensi pelaksana program merangka program perlindungan sosial yang lebih berkesan, PDPS akan mengandungi semua maklumat program dan juga profil kumpulan sasar perlindungan sosial di peringkat persekutuan, negeri dan organisasi. Capaian kepada semua pihak berkepentingan termasuk orang awam akan dibuka setelah PDPS siap dibangunkan sepenuhnya di bawah Rancangan Malaysia Ke-12 (RMKe-12).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG CHEN [SUBANG]**

**TARIKH : 3 OKTOBER 2022 (ISNIN)**

**SOALAN:**

Minta **PERDANA MENTERI** menyatakan:-

- (a) Rancangan Kerajaan secara terperinci dalam pelaksanaan Arahan Majlis Keselamatan Negara No. 23 termasuk garis masa, pembahagian kerja antara kalangan agensi Kerajaan; dan
- (b) Bagaimana UNHCR akan terlibat dan dirundingkan mengenai dasar ini.

**JAWAPAN**

**DI JAWAB OLEH YB DATUK DR. ABD LATIFF BIN AHMAD,  
MENTERI DI JABATAN PERDANA MENTERI  
(TUGAS-TUGAS KHAS)**

**Tuan Yang Dipertua,**

1. Kerajaan pada masa kini sedang melaksanakan proses pembaharuan berstruktur melibatkan mekanisme pengurusan pelarian dan pemohon suaka di Malaysia. Mekanisme ini akan diperkukuh dan ditambahbaik melalui pindaan kepada Arahan MKN No.23: Mekanisme Pengurusan Pendatang Asing Tanpa Izin yang Memegang Kad UNHCR yang telah berkuat kuasa sejak tahun 2009. Penambahbaikan Arahan ini melibatkan pewujudan Jawatankuasa Pengurusan Pelarian dan Pemohon Suaka yang akan dipengerusikan oleh Menteri berkaitan dan Jawatankuasa Kerja Peringkat Pegawai. Arahan ini juga menetapkan bidang tugas Kementerian dan Agensi berkaitan dengan isu-isu pelarian.

2. Bagi memastikan usaha Kerajaan seiring dengan kehendak dan keperluan antarabangsa dalam melindungi hak asas pelarian dan pemohon suaka, Kerajaan juga menubuhkan satu Pasukan Petugas Khas antara Kerajaan Malaysia dan UNHCR. Pasukan Petugas Khas ini dipengerusikan secara bersama oleh Kementerian Luar Negeri dan Pesuruhjaya Tinggi UNHCR di Kuala Lumpur sebagai platform bagi tujuan membincangkan isu – isu berkaitan pelarian dan pemohon suaka di Malaysia.

Sekian, Terima Kasih.



**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGKAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LIM GUAN ENG [BAGAN]**

**TARIKH : 3 OKTOBER 2022 (ISNIN)**

**SOALAN**

**TUAN LIM GUAN ENG [BAGAN]** minta **MENTERI KOMUNIKASI DAN MULTIMEDIA** menyatakan keberkesanan Pasukan Khas Jihad Tangani Inflasi sejak ditubuhkan pada Jun apabila kadar inflasi IHP dan inflasi makanan naik 4.4% dan 6.9% masing-masing pada Julai berbanding 3.4% dan 6.1% pada Jun 2022. Bolehkah YAB Perdana Menteri ganti menjadi Pengerusi demi meningkatkan komitmen melawan Inflasi.

**JAWAPAN**

Tuan Yang di-Pertua,

Ketidaktentuan ekonomi global dan krisis geo-politik dan perubahan iklim dunia serta kesan sampingan dari Pandemik COVID-19, memberi kesan kepada kos sara hidup Keluarga Malaysia. Selain itu, kenaikan harga jagung bijirin dan baja serta kos logistik juga menyebabkan peningkatan harga barangan yang menyaksikan kadar inflasi naik tinggi.

Pasukan Khas Jihad Tangani Inflasi ditubuhkan pada 29 Jun 2022 melalui keputusan Jemaah Menteri bertujuan antara lain untuk meneliti, memantau dan mencadangkan kepada Kerajaan langkah-langkah segera bersifat jangka pendek dan sederhana serta *action-oriented*, bagi menangani isu inflasi dan kenaikan harga barangan dan perkhidmatan. Sepanjang penubuhan pasukan ini, antara inisiatif dan keputusan penting telah diambil seperti berikut:

## SOALAN NO: 26

- (i) Pelaksanaan operasi bersepadu Kementerian Perdagangan Dalam Negeri dan Hal Ehwal Pengguna (KPDNHEP) bersama Polis Diraja Malaysia (PDRM), Jabatan Kastam Diraja Malaysia (Kastam), Jabatan Perkhidmatan Kuarantin dan Pemeriksaan Malaysia (MAQIS) dan Jabatan Sukarelawan Malaysia (RELA) bagi menangani ketirisan minyak masak bersubsidi ke luar negara. Bermula 1 Julai 2022 sehingga 30 Ogos 2022, perincian pemeriksaan ke atas premis adalah sebanyak 345 syarikat pembungkus, 2,203 pemborong dan 25,493 peruncit. Aktiviti pengauditan pemutihan telah mendapati sebanyak 140 kes di mana kebanyakannya daripada syarikat pembungkus dengan 52 kes;
- (ii) Universiti-universiti memperkenalkan Menu Keluarga Malaysia. Kementerian Pengajian Tinggi telah memperkenalkan program Bakul Makanan Siswa Keluarga Malaysia yang berharga RM3.50 dimana harga sebelum ini sekitar RM5.50 hingga RM6.50. Program Bakul Makanan Siswa Keluarga Malaysia mampu diperkenalkan kerana pihak kantin diberikan pengecualian bayaran sewaan selama enam bulan mulai Julai 2022;
- (iii) Pelaksanaan program Jualan Murah Keluarga Malaysia (JMKM) diperluaskan ke 600 kawasan Dewan Undangan Negeri (DUN) di seluruh negara melalui Fasa 2.0 bermula pada 15 Ogos 2022 hingga akhir tahun 2022. Jualan barangan keperluan utama serta keperluan lain dijual dengan harga 30% kurang daripada harga semasa. JMKM juga diperluaskan lagi ke 20 IPTA yang terpilih dengan konsep yang sama, namun ia mengikut kesesuaian dengan perbelanjaan dan keperluan pelajar;
- (iv) Pelaksanaan program Jualan Murah Keluarga Malaysia @ DE Dagang pula adalah inisiatif pembiayaan bersama antara kerajaan dan rakan platform digital (e-dagang, e-bayar dan ekonomi perkongsian), bertujuan untuk membantu perniagaan Malaysia dalam sektor sasaran seperti Pelancongan & Kraf, Halal & Pertanian dan Eksport (Jenama & Buatan Malaysia) untuk menerima pakai dan memanfaatkan platform digital untuk berkembang maju;

## SOALAN NO: 26

- (v) Pewartaan larangan eksport minyak sawit tulen dalam kemasan polibeg. Ini bagi mengelak kekeliruan dengan minyak masak polibeg bersubsidi;
- (vi) Mekanisme penetapan harga siling minyak masak botol tidak bersubsidi ditentukan secara bulanan untuk seluruh Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol 5kg untuk Sabah, Sarawak dan dan Labuan ditetapkan pada paras RM33.50 yang sebelum ini harganya sekitar RM45.70 sama seperti di Semenanjung, berkuat kuasa pada 8 September 2022;
- (vii) Mekanisme harga siling ayam standard telah dilakukan setelah Perintah Kawalan Harga diwartakan bagi membolehkan Penentuan Harga Maksimum diteruskan ke atas ayam dan telur. Harga ayam ditetapkan pada kadar RM9.40 sekilogram;
- (viii) Suruhanjaya Koperasi Malaysia (SKM) menggerakkan ribuan koperasi yang berjumlah 14,834 buah koperasi berdaftar dengan jumlah keahlian seramai 7.1 juta, diseluruh negara bagi memainkan peranan dan tanggungjawab dalam rantai bekalan makanan sebagai pengimport, pembungkus dan pengedar bagi enam produk keperluan asas termasuk minyak masak supaya ia dapat dipasarkan pada harga lebih murah; dan

Kesimpulannya, Kerajaan akan terus berusaha menjalankan dasar ekonomi yang terbaik, memandangkan negara akan berhadapan dengan pelbagai lagi cabaran pada tahun 2023 ini sama ada cabaran domestik mahupun cabaran global. Kerajaan perlu terus tangani krisis kesihatan, ekonomi dan politik yang datang bertali-arus.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK WILSON UGAK ANAK KUMBONG  
(HULU RAJANG)**

**TARIKH : 3 OKTOBER 2022  
(ISNIN)**

**SOALAN:**

Minta **MENTERI KANAN PERTAHANAN** menyatakan perancangan Kementerian dalam mengawasi sempadan negara khusus di antara Kalimantan dan Sarawak. Ini kerana ibu kota Indonesia baharu akan berpindah secara berperingkat ke Kalimantan Timur menjelang 2024.

**JAWAPAN**

Tuan Yang di-Pertua,

Pemindahan ibu kota Indonesia ke Kalimantan akan melibatkan beberapa fasa. Fasa pertama dijangka bermula pada tahun ini sehingga tahun 2024. Perpindahan Ibu Negara Indonesia ke Kalimantan dijangka akan memberi kesan positif dan menyumbang kepada pertumbuhan ekonomi kedua-dua negara khususnya di kawasan sempadan Sarawak-Kalimantan. Walau bagaimanapun, ia juga turut memberi kesan negatif terhadap aspek keselamatan khususnya dari sudut jenayah rentas sempadan seperti kemasukan pendatang asing tanpa izin, kegiatan perdagangan manusia dan penyeludupan barang kawalan.

Bagi mendepani cabaran ini, beberapa inisiatif telah dirancang dan sebahagiannya telahpun dilaksanakan. Ini termasuklah:

- a) Membina 14 pos kawalan baharu Tentera Darat Malaysia (TDM)

di sempadan Sarawak-Kalimantan. Daripada jumlah tersebut, 3 pos kawalan iaitu yang terletak di Batu Kaya, Padang Pan dan Sungai Paoh telah siap sepenuhnya dan mula beroperasi pada 19 Ogos 2022. Manakala sebuah pos kawalan dalam pembinaan di Tapak Megah dijangka siap pada penghujung Oktober 2022. Disamping itu, ATM juga akan memulakan pembinaan baharu 3 pos kawalan lagi pada November 2022 ini, iaitu di Mengkalap, Rapak Baru dan Tetangga Akrib;

- b) Membangunkan *Bare Base* Tentera Udara Diraja Malaysia (TUDM) di Lapangan Terbang Bintulu, Sarawak di bawah *Rolling Plan 2* Rancangan Malaysia ke-12 (RMKe-12);
- c) Membangunkan Markas Wilayah Laut 4 (MAWILLA 4) di Bintulu, Sarawak bagi meningkatkan keupayaan Tentera Laut Diraja Malaysia (TUDM);
- d) Memindahkan Markas Briged Infantri Tentera Darat dari Sibu ke Bintulu selain terus mempertingkatkan tahap kesiagaan dan kekuatan Tentera Darat di Bintulu, Sarawak;
- e) Meningkatkan keupayaan operasi pemantauan dan pengawasan sempadan melalui penggunaan aset-aset berteknologi tinggi bagi mengurangkan kebergantungan kepada kaedah pengawasan konvensional secara fizikal yang kurang efektif, mengambil kira faktor geografi sempadan Sarawak-Kalimantan yang luas dan diliputi hutan tebal;
- f) Memperkukuhkan keselamatan sempadan melalui kerjasama pertahanan secara dua hala mahupun serantau. Sebagai contoh, semasa Mesyuarat Jawatankuasa Am Sempadan Malaysia-Indonesia yang diadakan di ibu negara pada 9 Ogos 2022, kedua-dua negara telah mencapai kata sepakat untuk meneruskan rondaan terkoordinasi di sempadan (*Coordinated Joint Border Patrol*). Selain itu, penugasan Angkatan Tentera Malaysia dan Tentera Nasional Indonesia di Pos Gabungan Bersama (GABMA) melibatkan 14 pos di kedua-dua negara yang tertangguh seketika disebabkan COVID-19 akan diaktifkan semula; dan

- g) Menggembeleng sumber dan aset Kerajaan secara berpusat melalui pendekatan keseluruhan kerajaan (*whole-of-government*) antara pelbagai agensi penguatkuasaan.

Ini hanyalah sebahagian daripada pelbagai lagi usaha Kementerian untuk memperkukuh kawalan sempadan Malaysia-Indonesia. Ini termasuklah menambah kem-kem baharu di Sabah termasuk pembinaan Kem Lahad Datu seperti yang telah diumumkan oleh YB Menteri Kanan Pertahanan sewaktu lawatan kerja ke Sabah pada Januari lalu. Pada masa yang sama, kita perlu juga mengambil sikap positif atas perpindahan ibu kota Indonesia ini kerana secara tidak langsung, peningkatan tahap keselamatan di Kalimantan akan dapat membendung kegiatan jenayah rentas sempadan di antara kedua-dua negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KE-14**

---

**PERTANYAAN : LISAN**  
**DARIPADA : Y.B. TUAN CHA KEE CHIN**  
**[RASAH]**  
**TARIKH : 03 OKTOBER 2022 (ISNIN)**

**SOALAN :**

**TUAN CHA KEE CHIN [ RASAH ]** minta **PERDANA MENTERI** menyatakan apakah status terkini respons daripada setiap Kerajaan negeri terhadap undang-undang Anti-Lompat Parti, selepas pindaan Perlembagaan Persekutuan. Senaraikan negeri-negeri yang ada pandangan yang tidak selaras dengan Parlimen atau tidak bersetuju dengan pindaan yang seumpamanya terhadap Perlembagaan Negeri dan alasan-alasan yang diberikan.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Akta Perlembagaan (Pindaan) (No.3) 2022 [Akta A1663] mengenai larangan Ahli Dewan Rakyat bertukar parti telah mendapat perkenan Kebawah Duli Yang Maha Mulia Seri Paduka Baginda Yang di-Pertuan Agong XVI pada 31 Ogos 2022 dan telah diwartakan pada 6 September 2022. Namun, pelaksanaan kuat kuasa Akta A1663 ditangguhkan kepada suatu tarikh yang akan ditentukan kemudian, tertakluk perkenan Kebawah Duli Yang Maha Mulia Seri Paduka Baginda Yang di-Pertuan Agong XVI.

Dalam hal ini, seksyen 1(3), Akta Perlembagaan (Pindaan) (No. 3) 2022 [Akta A1663] memperuntukkan bahawa:

“Walau apa pun subseksyen (2), seksyen 6 Akta ini mula berkuat kuasa di sesuatu Negeri pada tarikh yang ditetapkan oleh Yang di-Pertuan Agong, dengan persetujuan Raja atau Yang di-Pertua Negeri, mengikut mana-mana yang berkenaan, melalui pemberitahuan dalam *Warta*”.

Oleh yang demikian, Kebawah Duli Yang Maha Mulia Seri Paduka Baginda Yang di-Pertuan Agong XVI boleh menetapkan tarikh permulaan kuat kuasa peruntukan seksyen 6 Akta A1663 dengan persetujuan Raja atau Yang di-Pertua Negeri, bagi Negeri yang berkenaan. Menerusi pindaan ini, Dewan Undangan Negeri boleh meluluskan pindaan kepada Perlembagaan negeri masing-masing yang melibatkan peruntukan seksyen 6(5) dan seksyen 7A Jadual Kelapan Perlembagaan Persekutuan.

Berdasarkan penjelasan ini, penetapan tarikh permulaan kuat kuasa pemakaian seksyen 6 Akta A1663 di peringkat Negeri adalah tertakluk kuat kuasa Akta A1663 di peringkat Persekutuan. Bagi maksud ini, beberapa buah negeri seperti Perak, Pulau Pinang, Selangor dan Negeri Sembilan menyambut baik cadangan pelaksanaan Akta ini di peringkat Negeri.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATUK DR. SHAHRUDDIN BIN SALLEH  
(SRI GADING)**

**TARIKH : 03 OKTOBER 2022 (ISNIN)**

**SOALAN**

**DATUK DR. SHAHRUDDIN BIN SALLEH [SRI GADING]** minta **MENTERI KANAN KERJA RAYA** menyatakan apakah inisiatif Kerajaan dalam membantu Kontraktor G1, G2 yang terkesan dengan ketidaktentuan ekonomi negara serta harga barangan binaan yang tidak menentu ketika ini.

**JAWAPAN**

Tuan Yang Di-Pertua,

Untuk makluman Ahli Yang Berhormat, Kementerian Kerja Raya amat prihatin dengan keadaan Kontraktor G1 & G2 yang mempunyai daya saing yang terhad kerana dalam peringkat permulaan kerjaya yang selalunya kekurangan pengalaman dan kepakaran dalam industri binaan. Oleh yang demikian, Kerajaan melalui Kementerian Kewangan Malaysia telah memberi beberapa kelonggaran tatacara dan peraturan perolehan mulai suku kedua tahun 2020. Kementerian Kerja Raya melalui Jabatan Kerja Raya telah berusaha membantu kontraktor Gred G1 & G2 mendapatkan projek kerajaan sepertimana yang dinyatakan dalam Pekeliling Perbendaharaan PK 2.2 'Kaedah Pelaksanaan Perolehan/Projek Kerajaan Tahun 2022 dan 2023 (Pindaan pada 1 Ogos 2022) yang berkuatkuasa mulai 1 Julai 2022 sehingga 30 Jun 2023 sepertimana berikut:

- i) Perolehan kerja tahunan boleh dipakejkan kepada pakej yang lebih kecil daripada perolehan secara tender untuk dilaksanakan secara sebut harga atau undian bagi perolehan bernilai melebihi RM20,000.00;
- ii) Pemberian kontrak kerja secara lantikan terus kepada kontraktor tempatan Gred G1 bagi kontrak bernilai sehingga RM20,000.00;
- iii) Pelaksanaan kerja requisition secara undian kepada kontraktor tempatan Gred G1 bagi had nilai sehingga RM100,000.00 dan menggunakan Jadual Kadar Kerja;
- iv) Kontraktor tempatan Gred G1 juga berpeluang untuk menyertai Sebut Harga bernilai RM20,000.00 sehingga RM200,000.00; dan
- v) Kontraktor tempatan Gred G2 pula berpeluang untuk menyertai Sebut Harga bernilai RM200,000.00 sehingga RM500,000.00.

Pekeliling ini terpakai dengan syarat Surat Setuju Terima hendaklah dikeluarkan selewat – lewatnya pada 30 Jun 2023.

Kementerian juga mengambil maklum mengenai kenaikan harga bahan binaan di pasaran berikutan kesan pandemik COVID-19 di seluruh dunia. Antara tindakan yang telah diambil oleh Kerajaan untuk membantu kontraktor kelas G1 Bumiputera menangani masalah kenaikan kos bahan pembinaan adalah Kementerian Kerja Raya (KKR) melalui Jabatan Kerja Raya (JKR) telah melaksanakan kajian terhadap jadual kadar harga yang dikhususkan kepada perlaksanaan projek kecil secara undi kontraktor G1 dan G2. Kerajaan melalui Kementerian Kewangan telah mengeluarkan surat bertarikh 12 Julai 2021 bagi meluluskan penggunaan Jadual Kadar Kerja (JKK) Kejuruteraan Awam dan Bangunan Tahun 2021 yang berkuatkuasa mulai 1 Julai 2021 sehingga 31 Disember 2022. JKR juga dalam proses mengkaji semula Jadual Kadar dengan mengambilkira kenaikan kos bahan binaan semasa.

Di samping itu, KKR melalui Lembaga Pembinaan Industri Pembinaan Malaysia (CIDB) telah mewujudkan accelerator programme (ACE) khusus kepada kontraktor golongan belia yang baru dalam gred G1 hingga G4 melalui kursus peningkatan kapasiti dan on-the-job training yang mana peruntukan sebanyak RM10 juta bagi meningkatkan keupayaan dan daya saing syarikat supaya boleh terus bersaing dalam industri pembinaan yang semakin mencabar ini. Di bawah program ACE, kontraktor gred G1 hingga G4 dan belia Bumiputera tahun 2022 akan diberi latihan melalui kursus peningkatan kapasiti dan on job training melalui CIDB. Program ini bertujuan untuk meningkatkan peluang kontraktor belia Bumiputera berumur 25 hingga 40 tahun dan mempunyai latar belakang teknikal untuk menyertai industri pembinaan melalui program pembangunan khusus bagi tempoh tertentu berfokuskan latihan berstruktur dengan dasar keutamaan (Carve-Out and Compete) dalam perolehan Kerajaan.

Sekian, terima kasih.

**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SYED IBRAHIM BIN SYED NOH  
[LEDANG]**

**TARIKH : 3 OKTOBER 2022 (ISNIN)**

**SOALAN:**

**TUAN SYED IBRAHIM BIN SYED NOH [LEDANG]** minta **MENTERI KOMUNIKASI DAN MULTIMEDIA** menyatakan perkembangan pendekatan “*supply-driven approach*” yang digunakan bagi pelaksanaan inisiatif 5G dalam negara.

**JAWAPAN:**

Tuan Yang di-Pertua,

Pelaksanaan rangkaian borong tunggal [*Single Wholesale Network* (SWN)] 5G oleh Digital Nasional Berhad (DNB) adalah berdasarkan model berpandukan penawaran (*supply-driven*). Kerja-kerja pembangunan rangkaian telah bermula seawal September 2021 dan telah menunjukkan kemajuan yang memuaskan.

Kerja-kerja pembangunan rangkaian 5G sedang giat dilaksanakan dan dijangkakan sasaran 36% liputan di kawasan berpenduduk akan dapat dicapai pada penghujung 2022. Perkembangan pelaksanaan infrastruktur 5G yang positif ini turut memberi keyakinan bahawa sasaran 80% liputan di kawasan berpenduduk pada penghujung 2024 mampu direalisasikan.

Sehingga 31 Ogos 2022, sebanyak 2,119 tapak 5G telah siap dibangunkan oleh DNB. Setelah hampir setahun pembangunan rangkaian borong tunggal dijalankan, liputan 5G di kawasan berpenduduk telah mencapai 33.2% melibatkan kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak. Buat masa ini, jumlah langganan perkhidmatan 5G dianggarkan telah melebihi 250,000 langganan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN AHMAD FAHMI BIN  
MOHAMED FADZIL  
[ LEMBAH PANTAI ]**

**TARIKH : 3 OKTOBER 2022 (ISNIN)**

**SOALAN :**

Minta **PERDANA MENTERI** menyatakan:

- i. Kesiapsiagaan terperinci Kerajaan, Agensi Pengurusan Bencana Negara (NADMA) dan agensi-agensi berkaitan bagi menghadapi risiko bencana cuaca Monsun Timur Laut di peringkat Persekutuan, negeri serta daerah; dan
- ii. Senarai peralatan dan aset jentera baharu diperuntukkan oleh Kerajaan bagi menghadapi bencana cuaca yang diramalkan.

**JAWAPAN**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

**Kesiapsiagaan Menghadapi MTL 2022/2023**

1. Sebagai langkah persediaan menghadapi bencana banjir sewaktu musim Monsun Timur Laut (MTL) 2022/2023, Mesyuarat Jawatankuasa Pengurusan Bencana Pusat (JPBP) Bilangan 2 Tahun 2022 telah diadakan pada 12 September 2022 yang dipengerusikan oleh YAB Perdana Menteri.
2. Memandangkan Jawatankuasa Pengurusan Bencana Daerah (JPBD) mempunyai fungsi penting untuk menguruskan bencana di lokaliti masing-masing, maka JPBP telah mengarahkan supaya JPBD diaktifkan dengan kadar segera bagi menghadapi sebarang kemungkinan berlakunya bencana khususnya banjir.
3. Bagi memantau persiapan Jawatankuasa Pengurusan Bencana Negeri (JPBN) dan JPBD untuk memastikan ianya berada pada tahap optimum, YBhg. Tan Sri Ketua Setiausaha Negara akan mempengerusikan *Task Force* Persediaan Menghadapi MTL 2022/2023. Mesyuarat *Task Force* akan diadakan secara berkala sehingga MTL bermula dan akan dihadiri oleh Kementerian, Agensi Teknikal, Agensi Tindak Balas dan semua JPBN.
4. Dari aspek pemantauan dan amaran awal, pihak Jabatan Pengairan dan Saliran (JPS) telah membuat persiapan melalui dua kaedah iaitu struktur dan bukan struktur. Langkah struktur melibatkan projek tebatan banjir yang merangkumi komponen seperti pemuliharaan sungai untuk mengurangkan risiko banjir, penggunaan pam bergerak, menaik taraf infrastruktur mekanikal dan elektrik serta pembinaan kolam takungan banjir.

5. Manakala bagi langkah bukan struktur pula, ianya merangkumi kerja-kerja menaik taraf stesen siren amaran banjir dan stesen kamera web untuk mengumpul dan memproses data hidrologi bagi tujuan ramalan dan amaran banjir. Siren amaran dinaik taraf dari segi bunyi dan akan disekalikan dengan pengumuman sekiranya berlaku banjir di kawasan titik panas (*hotspot*) tertutamanya di kawasan penempatan. Sesi libat urus dan ujian siren amaran juga telah dilaksanakan bersama penduduk di beberapa kawasan.
6. Bagi aspek pengurusan mangsa, Jabatan Kebajikan Masyarakat (JKM) telah bersiap sedia untuk mengaktifkan 6,010 Pusat Pemindahan Sementara (PPS) di seluruh negara yang mempunyai kapasiti untuk menempatkan 1,620,855 mangsa. Kementerian Pendidikan Malaysia juga telah diarahkan supaya membenarkan penggunaan asrama-asrama sekolah yang tidak dihuni pelajar ketika bencana berlaku untuk dijadikan PPS.
7. Pihak JKM juga telah bersedia memaksimumkan fasiliti penyimpanan bantuan bencana di seluruh negara bermula pada bulan September dan Oktober di lapan buah Depot Simpanan Keperluan Bencana (DSKB), 140 buah stor bencana di negeri dan daerah termasuk 53 buah mini depot (kontena). Bagi memastikan bekalan barang keperluan bencana mencukupi terutamanya di kawasan yang berisiko tinggi terputus hubungan, sebanyak 518 buah pangkalan hadapan juga telah disediakan.
8. Untuk mengatasi isu penyediaan makanan kepada mangsa di peringkat awal pembukaan PPS, JKM akan menyediakan makanan *retort* untuk tempoh 24 jam pertama sebagai kaedah penyediaan makanan dengan kadar segera memandangkan kesukaran untuk membuat unjuran sebenar makanan bermasak di awal pembukaan PPS berikutan kemasukan mangsa secara berperingkat serta proses pemindahan yang tidak tentu masa.
9. Selain itu, NADMA dalam proses untuk mengagihkan sebanyak 62,500 unit kit makanan untuk diagihkan kepada mangsa di PPS. NADMA juga telah mengagihkan sebanyak 127,272 buah *Collapsible Tent* (C-Tent) di seluruh negara. Terkini, NADMA telah



menerima sumbangan C-Tent sebanyak 103,000 unit daripada Yayasan Sultan Ibrahim.

10. JPBN dan JPBD telah diarahkan untuk memastikan bantuan bekalan sampai di semua lokasi yang terlibat bagi mengelakkan keadaan lebih sukar sekiranya jalan terputus dan sebagainya.
11. Dalam usaha meningkatkan pemahaman terhadap Arahan Majlis Keselamatan Negara (MKN) No. 20 dan memantapkan persediaan JPBN, JPBD, Pusat Kawalan Operasi Bencana (PKOB), Pos Kawalan Tempat Kejadian (PKTK) dan agensi-agensi tindak balas, NADMA telah melaksanakan sebanyak 26 program simulasi dan libat urus di seluruh negara.
12. Selain itu, latihan simulasi *Table Top Exercise* (TTX) dan *Field Training Exercise* (FTX) yang dianjurkan oleh agensi-agensi di peringkat JPBN dan JPBD telah dan sedang dilaksanakan menjelang MTL 2022/2023 ini.
13. Bagi meningkatkan tahap kesiapsiagaan komuniti pula, sebanyak 155 program Pengurusan Risiko Berasaskan Komuniti (*Community-Based Disaster Risk Management* – CBDRM) telah diadakan sepanjang tahun ini melibatkan 12,534 peserta yang terdiri daripada pelbagai lapisan komuniti.
14. Program ini dilaksanakan dengan kerjasama strategik daripada Kementerian Belia dan Sukan (KBS), Kementerian Pembangunan Luar Bandar (KPLB), badan-badan bukan kerajaan (NGO) dan beberapa buah yayasan. Selain pemimpin tempatan, penumpuan juga diberikan kepada golongan belia yang banyak terlibat dengan kerja-kerja sukarelawan untuk bertindak sebagai initial responder dan bantuan awal.
15. Untuk memantapkan lagi hebahan amaran bencana kepada orang awam, Kementerian Komunikasi dan Multimedia Malaysia (K-KOMM) telah mengadakan beberapa siri mesyuarat berkaitan hebahan amaran awal bencana dan satu jawatankuasa berkaitan perkara ini telah ditubuhkan. Antara cadangan yang telah

dibincangkan adalah penggunaan aplikasi Whatsapp sebagai medium hebahan. Dua kaedah yang diguna pakai sebelum ini iaitu SMS dan *flash broadcast* akan diteruskan sebagai salah satu medium hebahan amaran bencana kepada orang awam.

Senarai Peralatan dan Aset Jentera Baharu

16. Sebagai usaha mempekasa peranan komuniti sebagai *initial responder* ketika berlakunya bencana, NADMA telah memperuntukkan sebanyak RM4.8 juta bagi pembekalan 320 unit bot fiber berenjin dan jaket keselamatan kepada semua JPBN berdasarkan bilangan daerah iaitu sebanyak RM30,000.00 bagi setiap daerah.
17. Selain itu, secara keseluruhannya seramai 76,336 pegawai dan anggota agensi tindak balas di semua peringkat berada dalam keadaan siap siaga sepenuhnya dengan pelbagai aset dan peralatan berjumlah 22,622 meliputi aset darat, air, udara, perubatan dan lain-lain dengan pecahan seperti berikut:

SUMBER MANUSIA	ASET				
	DARAT	AIR	UDARA	PERUBATAN	LAIN-LAIN
<b>79,549</b>	<b>4,409</b>	<b>22,622</b>	<b>20</b>	<b>705</b>	<b>1,180</b>
Nota: Aset darat: Lori, 4x4, Bas, Van dan Jengkaut/ <i>Backhoe</i> Aset air: Bot, enjin bot, <i>trailer bot</i> , <i>life jacket</i> dan jetski Aset udara: Helikopter dan kapal terbang pengangkut Aset perubatan: Ambulans Lain-Lain: Set generator dan pam bergerak (JPS)					

18. Perincian bagi aset-aset baru yang dilaksanakan perolehan oleh agensi-agensi Kerajaan bagi tujuan pengurusan bencana sewaktu MTL 2022/2023 adalah seperti di Lampiran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB PUAN HAJAH FUZIAH BINTI SALLEH  
(KUANTAN)**

**TARIKH : 03 OKTOBER 2022 (ISNIN)**

**SOALAN**

**PUAN HAJAH FUZIAH BINTI SALLEH [KUANTAN]** minta **MENTERI KANAN KERJA RAYA** menyatakan usaha dan tindakan drastik pihak Kerajaan dalam mengatasi isu banjir di laluan utama Lebuhraya Kuala Lumpur – Karak dan Lebuhraya Pantai Timur sehingga menyebabkan berlaku terputus laluan akibat banjir dan limpahan air sungai di kawasan tersebut hampir setiap tahun.

**JAWAPAN**

Tuan Yang Di-Pertua,

Untuk makluman Ahli Yang Berhormat, pihak Kementerian Kerja Raya (KKR) melalui Lembaga Lebuhraya Malaysia (LLM) telah pun mengenalpasti lokasi yang terlibat dengan kejadian banjir dan merangka tindakan penyelesaian jangka panjang bagi mengatasi isu banjir di laluan utama Lebuhraya Kuala Lumpur – Karak (KL-Karak) dan juga Lebuhraya Pantai Timur Fasa 1 (LPT1). Pada masa ini, Syarikat Konsesi lebuhraya sedang menyediakan rekabentuk terperinci dan dijangka akan dimuktamadkan sebelum kerja-kerja pembinaan dapat dilaksanakan di tapak yang dijangka akan bermula pada akhir tahun ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AKMAL NASRULLAH BIN MOHD. NASIR  
[JOHOR BAHRU]**

**TARIKH : 3 OKTOBER 2022 (ISNIN)**

**SOALAN:**

minta **PERDANA MENTERI** menyatakan jumlah perbelanjaan bagi setiap Jelajah Aspirasi Keluarga Malaysia serta kempen-kempen Keluarga Malaysia dari awal permulaan kempen sehingga setakat Ogos 2022.

**JAWAPAN**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Program Jelajah Aspirasi Keluarga Malaysia (JAKM) merupakan program yang diadakan di setiap negeri sepanjang tahun 2022 sebelum satu acara penutup yang akan diadakan di Putrajaya. Program ini membawakan pelbagai acara yang memberi manfaat serta kemudahan kepada rakyat setempat. Antaranya adalah melalui pembukaan reruai (*booth*) perkhidmatan agensi kerajaan, reruai jualan usahawan Industri Kecil dan Sederhana (IKS), Jualan Murah Keluarga Malaysia, Program Jamin Kerja Keluarga Malaysia, Kenduri Rakyat Keluarga Malaysia selain slot-slot atas pentas yang menyampaikan informasi mengenai inisiatif Kerajaan untuk orang ramai.

2. Selain itu, pelbagai program tarikan pengunjung turut diadakan seperti Sukan Rakyat, Persembahan Seni dan Kebudayaan, Acara Kayuhan Santai (*Fun Ride*), Pertandingan *e-Sports* dan pelbagai lagi program bersesuaian dengan penduduk di negeri yang menjadi tuan rumah siri jelajah tersebut.
3. Oleh yang demikian, perolehan untuk program JAKM ini dilaksanakan dengan melantik syarikat pengurus acara mengikut enam (6) zon iaitu Zon Utara, Zon Selatan, Zon Pantai Timur, Zon Tengah, Zon Sabah dan Zon Sarawak. Sehingga Ogos 2022, hanya tiga (3) zon sahaja yang telah selesai sepenuhnya pelaksanaan kesemua siri bagi zon berkenaan iaitu Zon Sabah, Zon Sarawak dan Zon Tengah masing-masing dengan hanya satu siri sahaja bagi setiap zon tersebut.
4. Kos pelaksanaan bagi Zon Sabah adalah sebanyak RM5,350,244.00 manakala bagi Zon Sarawak adalah berjumlah RM5,375,154.00. Zon Tengah pula iaitu bagi pelaksanaan JAKM Negeri Selangor telah membabitkan kos sebanyak RM5,278,789.40. Semua kos-kos yang dinyatakan ini termasuk SST ke atas kontrak yang dianugerahkan kepada kesemua syarikat terpilih. Manakala, untuk kos pelaksanaan bagi Zon Pantai Timur (3 siri), Zon Utara (4 siri) dan Zon Selatan (3 siri) hanya akan dapat dimuktamadkan selepas kesemua siri JAKM bagi zon-zon berkenaan selesai dilaksanakan sepenuhnya.
5. Inisiatif untuk mempromosikan Keluarga Malaysia turut diperhebatkan melalui pelbagai medium yang relevan dan bersesuaian. Antaranya perkongsian mengenai program Keluarga Malaysia dari semasa ke semasa melalui platform media massa seperti TV, radio dan media sosial seperti Facebook, Instagram, Twitter dan Youtube. Usaha ini penting bagi meningkatkan penghayatan dan kefahaman seluruh Keluarga Malaysia mengenai aspirasi dan dasar semasa Kerajaan ini.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KE-14**

---

**PERTANYAAN : LISAN**  
**DARIPADA : Y.B. TUAN SIVAKUMAR A/L VARATHARAJU**  
**NAIDU [BATU GAJAH]**  
**TARIKH : 03 OKTOBER 2022 (ISNIN)**

**SOALAN**

**TUAN SIVAKUMAR A/L VARATHARAJU NAIDU [ BATU GAJAH ]** minta **PERDANA MENTERI** menyatakan hasil siasatan Suruhanjaya Pencegahan Rasuah Malaysia (SPRM) terhadap mereka yang ditangkap kerana penyelewengan dana MITRA. Apakah tindakan-tindakan susulan yang telah diambil oleh SPRM terhadap mereka yang terlibat dalam penyelewengan dana MITRA setelah selesai siasatan dilakukan.

**JAWAPAN**

**YB DATO' SRI DR. HAJI WAN JUNAIDI BIN TUANKU JAAFAR,**  
**MENTERI DI JABATAN PERDANA MENTERI**  
**(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) telah membuka 33 buah Kertas Siasatan (KS) terhadap penyelewengan dana unit transformasi masyarakat India Malaysia (MITRA) sepanjang tahun 2021 dan 2022. Sebanyak lapan (8) orang telah didakwa di Mahkamah di seluruh negara. Siasatan kes ini masih lagi diteruskan dengan beberapa KS dalam kajian Timbalan Pendakwa Raya. Di samping itu tindakan pelucuthakkan turut dilakukan. Antara tindakan lain yang dilaksanakan ialah pemeriksaan terhadap kelemahan sistem dan prosedur berkaitan dana MITRA.

Sekian, terima kasih.

**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATO' SYED ABU HUSSIN BIN HAFIZ  
SYED ABDUL FASAL [BUKIT GANTANG]**

**TARIKH : 3 OKTOBER 2022 (ISNIN)**

**SOALAN:**

**YB Dato' Syed Abu Hussin bin Hafiz Syed Abdul Fasal [Bukit Gantang]** minta **MENTERI KOMUNIKASI DAN MULTIMEDIA** menyatakan langkah-langkah terkini yang telah diambil bagi mengatasi kelembapan capaian internet 4G di kawasan luar bandar seperti di Trong, Bukit Gantang dan Matang dalam Parlimen Bukit Gantang.



**JAWAPAN**

Tuan Yang di-Pertua,

Dalam memastikan setiap Keluarga Malaysia dapat menikmati pengalaman jalur lebar yang lebih baik, Kerajaan sentiasa komited dan cakna untuk meneruskan pembangunan infrastruktur komunikasi bagi segenap lapisan masyarakat.

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) sentiasa menjalankan ujian dan audit kualiti perkhidmatan dari semasa ke semasa bagi memastikan perkhidmatan yang diberikan oleh pemberi perkhidmatan memenuhi standard yang telah ditetapkan dalam Standard Mandatori untuk Kualiti Perkhidmatan bagi Jalur Lebar Tanpa Wayar.

Di bawah Pelan Jalinan Digital Negara (JENDELA) Fasa 1, inisiatif-inisiatif yang telah dan sedang dijalankan di Negeri Perak dan Parlimen Bukit Gantang termasuk di DUN Trong setakat suku kedua 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gantian Optik		Jalur Lebar Satelit
	Perancangan	Siap	Perancangan	Siap	Perancangan	Siap	Siap
Perak	196	67	2,346	2,128	251,662	242,923	73
Parlimen Bukit Gantang	14	4	126	113	4,343	2,926	-
DUN Trong	8	2	21	18	503	8	-

Bagi kawasan Matang pula, pihak SKMM akan menjalankan pemantauan dan kajian bagi mengatasi masalah isu-isu capaian internet di kawasan Matang. Maklum balas daripada orang awam bagi kawasan yang mempunyai masalah perkhidmatan adalah amat dialu-alukan bagi membolehkan tindakan selanjutnya diambil. Sebarang aduan yang berkaitan kualiti perkhidmatan dan rangkaian telekomunikasi boleh disalurkan terus kepada portal SKMM dan juga JENDELA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

**PERTANYAAN : LISAN**

**DARIPADA : YB DATUK IGNATIUS DORELL LEIKING  
(PENAMPANG)**

**TARIKH : 03 OKTOBER 2022 (ISNIN)**

**SOALAN**

**DATUK IGNATIUS DORELL LEIKING [PENAMPANG]** minta **MENTERI KANAN KERJA RAYA** menyatakan tindakan yang akan diambil untuk memastikan Jalan Penampang-Kinarut/Papar Old Highway dari Nambazan hingga ke Lokkawi mendapat kemudahan lampu jalan memandangkan kawasan ini selalu mengalami kemalangan pada waktu malam.

**JAWAPAN**

Tuan Yang Di-Pertua,

Untuk makluman Ahli Yang Berhormat, Kementerian ini mengambil perhatian terhadap jalan-jalan gelap yang boleh mengundang risiko bahaya kepada pengguna jalan raya. Kementerian ini ada melaksanakan Program Menaiktaraf Infrastruktur Keselamatan Jalan Raya di bawah skop kerja pemasangan lampu jalan di kawasan kemalangan atau berisiko kemalangan akibat jalan gelap. Pemasangan lampu jalan di bawah Program ini adalah bersifat setempat (*localized*) (dengan izin) dengan merujuk kepada kriteria seperti persimpangan, selekoh berbahaya, aduan awam dan juga kawasan yang mempunyai jumlah kemalangan yang tinggi dan bukan bagi tujuan pencahayaan di sepanjang laluan.

Untuk makluman Ahli Yang Berhormat, berdasarkan semakan Kementerian ini adalah didapati bahawa Jalan Penampang-Kinarut / Papar Old Highway (dengan izin) dari Nambazan hingga ke Lok Kawi adalah jalan di bawah bidang kuasa Kementerian dengan nombor laluan R501 dan panjang 18.93km. Oleh yang demikian, ianya telah disenarai pendek oleh JKR Negeri Sabah melalui Cawangan Kejuruteraan Elektrik Ibu Pejabat JKR Malaysia bagi cadangan pelaksanaan kerja pemasangan lampu jalan melalui Program Menaiktaraf Infrastruktur Keselamatan Jalan Raya bagi tahun 2023. Namun demikian, pelaksanaannya adalah tertakluk kepada kelulusan peruntukan oleh Agensi Pusat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA,  
PARLIMEN KE-14**

---

**PERTANYAAN : LISAN**  
**DARIPADA : Y.B. TUAN SYED SADDIQ BIN SYED  
ABDUL RAHMAN [MUAR]**  
**TARIKH : 03 OKTOBER 2022 (ISNIN)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **PERDANA MENTERI** menyatakan komitmen Kerajaan dalam memudahkan proses mengundi (seperti meluaskan sistem undi pos) menjelang PRU akan datang bagi memudahkan pengundi. Sebagai contohnya, pengundi yang bekerja di Sabah/Sarawak untuk pulang mengundi di Semenanjung Malaysia dan *vice versa* atas sebab tiket kapal terbang yang meningkat 2 hingga 3 kali ganda menjelang PRU yang akan datang.

**JAWAPAN**

**YB DATO' SRI DR. HAJI WAN JUNAIDI BIN TUANKU JAAFAR,**  
**MENTERI DI JABATAN PERDANA MENTERI**  
**(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Perkara 119 Perlembagaan Persekutuan menetapkan salah satu kelayakan untuk didaftarkan sebagai pemilih ialah bermastautin dalam mana-mana Bahagian Pilihan Raya. Bagi maksud tersebut, Suruhanjaya Pilihan Raya Malaysia (SPR) menentukan Bahagian Pilihan Raya seseorang pemilih berpandukan kepada alamat pemastautin pemilih berdasarkan maklumat di kad pengenalan dan pangkalan data Jabatan Pendaftaran Negara.

Buat masa ini, SPR tidak bercadang memperluaskan kategori pengundi pos untuk membenarkan pemilih yang bekerja di Sabah/Sarawak untuk pulang mengundi di Semenanjung Malaysia dan *vice versa*. Kemudahan mengundi secara pos hanya diberikan kepada pengundi dalam kategori seperti berikut:

- i. Ahli SPR dan kakitangan SPR;
- ii. Petugas pilihan raya;
- iii. Tentera, Polis, Polis Pasukan Gerak Am (PGA) yang bertugas pada Hari Mengundi Awal;
- iv. Pengamal media yang bertugas membuat liputan pilihan raya di luar kawasan pada Hari Mengundi;
- v. Kakitangan bagi 9 Agensi (Jabatan Bomba dan Penyelamat Malaysia, Jabatan Penjara Malaysia, Agensi Penguatkuasaan Maritim Malaysia, Sukarelawan Simpanan Polis, Jabatan Imigresen Malaysia, Jabatan Kesihatan Malaysia, Jabatan Pendaftaran Negara-UTC, Angkatan Pertahanan Awam Malaysia, Agensi Pengurusan Bencana Negara) yang bertugas pada Hari Mengundi;
- vi. Pengundi Malaysia yang berada di luar negara; dan
- vii. Pengundi Tidak Hadir (PTH) luar negara iaitu penjawat awam yang berkhidmat di luar negara dan pasangan serta pelajar universiti/institusi tinggi sepenuh masa di luar negara dan pasangan.

Oleh demikian, SPR menggalakkan pengundi untuk memohon pertukaran Bahagian Pilihan Raya berdasarkan tempat bermastautin terkini bagi memudahkan urusan pengundian bagi suatu pilihan raya.

Sekian, terima kasih.

**PEMBERITAHUAN PERTANYAAN  
DEWAN RAKYAT, MESYUARAT KETIGA, PENGGAL KELIMA,  
PARLIMEN KE-14**

**PERTANYAAN : LISAN**

**DARIPADA : DATUK ROZMAN BIN ISLI [LABUAN]**

**TARIKH : 3 OKTOBER 2022 (ISNIN)**

**SOALAN**

**DATUK ROZMAN BIN ISLI [LABUAN] minta MENTERI KOMUNIKASI DAN MULTIMEDIA menyatakan:**

- (a) langkah Kerajaan bagi menarik minat para pelabur untuk membangunkan pusat data serantau khususnya di Malaysia Timur; dan
- (b) adakah Kerajaan bercadang untuk menjadikan Labuan sebagai sebuah wilayah yang mesra pelaburan digital termasuklah sebagai sebuah pusat data antarabangsa.

**JAWAPAN**

Tuan Yang di-Pertua,

Kerajaan sentiasa komited untuk mencapai aspirasi MyDIGITAL yang menyasarkan Malaysia sebagai sebuah ekonomi digital yang moden. Antara sasaran MyDIGITAL adalah untuk menarik pelaburan berkaitan digitalisasi berjumlah RM70 bilion, jumlah pendapatan hasil perkhidmatan pusat data dan pengkomputeran awan syarikat-syarikat tempatan sebanyak RM3.6 bilion dan pertumbuhan pesat kapasiti kabel dasar laut bagi meletakkan Malaysia sebagai lokasi yang sangat kompetitif di rantau ASEAN.

Lokasi yang dipilih oleh pelabur untuk membina infrastruktur digital seperti pusat data adalah berdasarkan banyak faktor termasuk permintaan tempatan untuk perkhidmatan mereka serta kesediaan lokasi untuk pelaburan tersebut. Pelaburan pusat data kini tertumpu di Johor untuk permintaan limpahan dari Singapura dan juga di Lembah Klang di mana permintaan domestik tertumpu. Kerajaan terbuka kepada pilihan lokasi oleh pelabur dan akan memudahkan sekiranya pelabur berminat membangunkan pusat data mereka di Labuan.

Terdapat perkembangan di Sarawak di mana kerajaan negeri dan sektor swasta telah bekerjasama untuk menyediakan Sarawak untuk pelaburan digital. Projek-projek yang sedang dibangunkan adalah sebuah pusat data *Tier IV* dan dua sistem kabel dasar laut, iaitu *Batam Sarawak Internet Cable System* (BaSICS) dan *South-East Asia Hainan-Hongkong Express Cable System* (SEA-H2X). Persiapan projek-projek ini akan memberi manfaat kepada Sarawak serta Sabah, Labuan dan Kalimantan dan meningkatkan daya tarikan untuk pelaburan digital selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KELIMA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM TZE TZIN  
[BAYAN BARU]**

**TARIKH : 3 OKTOBER 2022 (ISNIN)**

**SOALAN:**

Minta **PERDANA MENTERI** menyatakan rasional cadangan Ketua Pengarah Majlis Keselamatan Negara menutup pejabat UNHCR di Kuala Lumpur. Adakah cadangan tersebut telah dibincang di peringkat Kabinet mengenai implikasi kepada kedudukan Malaysia di peringkat antarabangsa



**JAWAPAN**

**DIJAWAB OLEH YB DATUK DR. ABD LATIFF BIN AHMAD  
MENTERI DIJABATAN PERDANA MENTERI  
(TUGAS-TUGAS KHAS)**

**Tuan Yang Dipertua,**

1. Asas keberadaan UNHCR di Malaysia bermula pada tahun 1975 melalui pertukaran surat antara UNHCR bertarikh 10 September 1975 dan Nota Diplomatik **Yang Mulia Tengku Ahmad Rithaudden Al-Haj Tengku Ismail**, Menteri Luar Negeri pada ketika itu. Sebagai tanda penghargaan kepada usaha UNHCR membantu Malaysia dalam menangani isu pelarian Indo-Cina (Vietnam) pada waktu tersebut, Menteri Luar Negeri pada ketika itu telah bersetuju dengan permohonan UNHCR untuk mendapatkan "*normal facilities, privileges and immunities*" bagi pengoperasian Pejabat UNHCR di Kuala Lumpur. **Nota Diplomatik tersebut telahpun memberikan gambaran bahawa keberadaan UNHCR di Malaysia hanyalah untuk membantu dalam menyelesaikan isu ketibaan pelarian Indo – China ke Malaysia pada masa tersebut sahaja,** namun UNHCR tetap kekal berada di Malaysia sehingga hari ini. Negara bukanlah negara pihak kepada Konvensyen Mengenai Status Pelarian 1951 dan Protokol Mengenai Status Pelarian 1967, justeru keberadaan pihak UNHCR di negara ini bukanlah suatu obligasi terhadap Malaysia seperti mana negara – negara yang menjadi negara ahli kepada Konvensyen 1951 dan Protokol 1967 tersebut.
2. Kerajaan telah menetapkan bahawa atas dasar kemanusiaan, pelarian yang telah berdaftar dengan pihak UNHCR di Malaysia untuk tinggal secara sementara sahaja di dalam negara sebelum ditempatkan ke negara ketiga atau pulang ke negara asal selepas krisis kemanusiaan di negara mereka selesai. Namun, dalam situasi terkini, Kerajaan mendapati bahawa proses penghantaran pelarian ke negara ketiga yang sewajarnya dilakukan oleh UNHCR dan IOM

adalah terlalu perlahan, dan ini secara tidak langsung menyebabkan berlakunya peningkatan jumlah pelarian di dalam negara. Ketidakecekapan kedua – dua pihak ini dalam menguruskan pelarian secara tidak langsung juga menjadi suatu faktor penarik kehadiran lebih ramai pelarian ke negara ini apabila terdapatnya insiden – insiden di mana pelarian sedia ada di dalam negara ini telah menaja pelarian lain yang masih lagi berada di kem – kem pelarian di negara asing melalui sindiket – sindiket yang dipercayai terlibat dengan penyeludupan manusia untuk datang ke negara ini.

3. Justeru, atas faktor kepentingan keselamatan, kedaulatan negara serta keharmonian rakyat, Kerajaan akan memastikan bahawa mekanisme pengurusan di dalam negara di masa hadapan untuk dilaksanakan sepenuhnya oleh Kerajaan. Tindakan ini sekaligus membolehkan Kerajaan untuk mengurangkan kebergantungan terhadap entiti asing seperti UNHCR dan IOM dalam pengurusan pelarian. Tindakan jangka panjang yang akan dilaksanakan juga adalah termasuk pelaksanaan pembaharuan berstruktur (*structural reform*) terhadap dasar sedia melalui pindaan ke atas Arahan Majlis Keselamatan Negara No.23: Mekanisme dan Dasar Pengurusan PATI yang Memegang Kad UNHCR yang mana pelaksanaan dokumen ini setelah dimuktamadkan kelak akan juga akan dibentangkan untuk kelulusan Jemaah Menteri.

Sekian, Terima Kasih.